

ዝያረት ርኢስ ኢሳይያስ እት ሱዳን

ርኢስ ኢሳይያስ አፈወርቂ፡ እብ ዐዙመት ርኢስ መጅልስ ስያዲ ሱዳን ዐብዱልጋሕ አልቡርሃን የም 29 ኖቨምበር ምን ኤረትሮፕ እብ መካይን ፖርት ሱዳን እንዲ ኡተ፡ ናይ ክልኤ አምዕል ዝያረት ሸቅል ሐቀለ ወደ የም 30 ኖቨምበር አምሱይ ዐዱ አቅበለ።

ርኢስ ኢሳይያስ ዲብ ዝያረቱ ምስል ርኢስ መጅልስ ስያዲ ሱዳን ጀነራል ዐብዱልጋሕ አልቡርሃን፡ ርኢስ ውዘራእ ሱዳን ዶ/ር ካምል እድሪስ፡ ሓክም ውላዮት ዳርፎር ምኒ ኣርኮ ሚናዊ ውበዕም ሰብ ሰልጠት እንዲ አማሕበረ፡ ዲብ አደቃብ ዕላቀት ኤረትሮፕ ወሱዳን፡ ተጠውራት ደግሸ ሱዳን ወእት ባልሓቱ ገብእ ለሀለ ጅህድ፡ ወናይ ሕበር አህምየት እት ብዲቡ ናይ መንጠቀት ወእዲን ጋራት ሀድገ።

ሀደፍለ ዝያረት፡ መብዳእ ሳብት

ወተአደድ ሸዑብ ወሕኩመት ኤረትሮፕ እት ውሕደተ ወስያደተ ለተአከደት ሱዳን እብ ድግማን አከዶት ክምቱ ለሸርሐ ርኢስ ኢሳይያስ፡ ሰላም ዳይመት አስክ ትትረኩብ ህዩ ኤረትሮፕ መጦር ሱዳን ወመስኡልየት አከዶት ውሕደተ ለሐፍዘት ወመስኩብት ለትመደደት እት ሱዳን ራፍዕ ለሀለ መጅልስ መዐደዩ ክም ትበጥር አፍህመ።

ጀነራል አልቡርሃን እብ ጀህቱ፡ መብዳእ ኤረትሮፕ ዲብ ቀድየት ሱዳን ሐቀ ሐመድ፡ ዐቦት ሕበር እበ ለአክድ መጃል እግል ትደቀብ ወትፍያሕ ክም ልትከደም አከደ።

ርኢስ ኢሳይያስ አፈወርቂ ዲብ የም 29 ኖቨምበር ምን ኤረትሮፕ እብ መካይን ፖርት ሱዳን ዲበ እት እቱ ወክድ፡ ኩቡቱ ረስምየት ወሸዑብየት ገብአት እግሉ።



እድንያይት አምዕል ኤች.አይ.ቪ/ኤይድስ ትዘክር

ሄለል ዲሰምበር እድንያይት አምዕል ኤች.አይ.ቪ/ኤይድስ፡ “ርክብት ለህሌት ዐውቲ እንዲ ሓፈዝ እት ታርፍ ለሀለ ንክደም” እበ ትብል ሰቅራት እብ ደረጃት ወጠን እግል 33ይት ኢነት ዲብ አስመረ ትዘክረት።

ዲብ ውዛረት ዓፍየት መዲር ፈሬዕ መራቅበት ሕማማት ዐደዮት ዶ/ር ኣርአዮ ብርሃኔ፡ ለመናሰበት ድድ ኤች.አይ.ቪ/ኤይድስ ለእንወድየ መዳፍዐት ለእንቀይም እት ወገለድነ ለነሐድስ እት ክምተ እንዲ ዘክረ፡ ዲበ ሐልፈየ 10 ሰነት ቅያስ ዐደዮ ዲብ ዓማር 15 አስክ 54 ሰነት፡ እብ 50 ምእታይት እንዲ ነቅሱ፡ ዲብ 0.35 ምእታይት ክም ትክረ፡ ዐደዮ ሐዳስ ዲብ ዕምር ምን 15 አስክ 24 ሳቶም ሸባብ ወሞት እብ ሰበብ ኤይድስ ህዩ ዲብል ትደህረት ደረጃት ክም



ትክራት ትሸርሐ።

እምበል እሊ ዐደዮ ምን እም ዲብ ዐልቀት መጅብ ዲብ ባሕ ክም ትክራት፡ ምስል ኤች.አይ.ቪ ለነብሮ መዋጥኒን ህዩ ድድለ ሻይረስ ደወ እብ ለሀ ዲብ ነስኦ 95 ምእታይት ምኖም ዐደድለ ሻይረስ ዲብ ደሞም ዲበ እብ ለቦራቶሪ ለኢትሌሌ እት



ደረጃት ክም በጽሐ አፍህመ።

ርክብት ለህሌት ዐውቲ ለተአሸንን ምንማት፡ ዲብ ገሌ ክፋላት መጅተማህ እብ ሰበብ ጠቢዐቶም ወጠቢዐት ሸቅሎም ዲብ ልትርኤ ለዐደዮ ብዘሕት ሰበት ህሌት፡ እንዲ ኢንትፈገዕ ምን ኤች.አይ.ቪ ናጊ መጅተማህ እግል ለህሌ እነ እግል ንክደም ክም ወጅብ አትፋቀደ።

ወኪል እድንያይት መዝመት

ዓፍየት ዐለም ዲብ ኤረትሮፕ ዶክተራት ሚሪ ስተፈን እብ ጀህቱ፡ ኤረትሮፕ ዲብ ክርዐት ኤች.አይ.ቪ/ኤይድስ ስጅልተ ለህሌት ዐቦት እንዲ ሐመደት፡ ዲብ ሰነት 2024 ሐድ 1.3 ሚልዮን ዐደዮ ሐዳስ ሰበት ትሰጃለት፡ እብ ደረጃት ዐለም ሐድ 40.8 ሚልዮን ነፈር ምስል ኤች.አይ.ቪ ክም ነብሮ ሐድ 630 አልፍ ህዩ እብሊ ሕማም ወህቱ ለለመጽኡ ዕድር ክም መይቶ

አፍህመት።

እት ውዛረት ዓፍየት መስኡለት መራቀብት ኤች.አይ.ቪ ወእብ ጅማሪ ለለዐዲ ሕማማት ሲሰተር ንግስቲ ተሰፋሚካኤል ህዩ፡ ቅያስ ወመትመዳድ ኤች.አይ.ቪ/ኤይድስ ዲብ ዐድነ ወእግል ዳፍዶቱ ልትነሳእ ለሀለ ምስዳራት ወሄራሩ ለክሰስ ሸርሕ ትቀድም ዲብ ህሌት፡ አንፋር ማሕበር ሐካይም ኤረትሮፕ ህድግ ሕበር ወደወ።

እት መናሰበት፡ ወካይል መዝመት አጅኒት (UNICEF) ወሰንዱቅ ሸዑብ (UNFPA) መዝመት መጅልስ ቅራን ዲብ ኤረትሮፕ ናይ ተአደድ ክሊማት አስምዐው።

እት ደንገበ ህዩ ሰብ ምራድ አንፋር ማሕበር ብድሆ እብ ሰበትለ ሕማም ወተጃርኮም ሸርሕ ቀደመው።

ከረን፡ መሓደረት እብ ክሱሱ አምዕል ኤይድስ

ዐደዮ ኤች.አይ.ቪ/ኤይድስ እት ባሕ እግል ልትክረ እትለ ገብእ ጅህድ ዶር መአሰሳት ሃይበት ከደማት ስያሐት ክም ለአትሐዘ፡ መዲር ዓም ቅስም ስያሐት አቅሊም ዐንሰበ አሰይድ ሳልም ዐሊ ሸርሐ።

እብ መናሰበት ሄለል ዲሰምበር - እድንያይት አምዕል ኤይድስ ዲብ የም 28 ኖቨምበር ዲብ መዲነት ከረን እግል ሰብ መአሰሳት ወሸቃለ መአሰሳት ሃይበት ከደማት ስያሐት ዲበ ትነዝመት መሓደረት፡ አሰይድ ሳልም፡ ለሕማም አስክ ሰነት 2030 እግል ልሰረት እብ መዝመት ዓፍየት ዐለም ኢቱን ለሀለ ሀደፍ እግል ልትበጸሕ።



ፈዛዐት መጅተማህ እብ ዓመት፡ ስያሐት ህዩ እብ ፍንቲት እግል ፈህም መአሰሳት ሃይበት ከደማት

ልዕሴ አትፋቀደ።

እት ፈሬዕ ውዛረት ዓፍየት አቅሊም ዐንሰበ መስኡለት ውሕደት ዳፍዶት ወመራቀብት ኤች.አይ.ቪ/ኤይድስ ወእብ ጅማሪ ለለዐዲ ሕማማት ሲሰተር ምጽላል ተሰፋሚያም ወነፈር አትፋዝየት ወሐብሬ አሰይድ ብርሃኔ ዐንደም እብ ጀህቶም፡ እግል መራቀብትለ ሕማም ምን ሰነት 2002 እንዲ አንበተ አትፋዝየት ወመሓደራት ምን ገብኦ፡ ለዐደዮ ናቅሶት ክም ህሌት፡ ለሕማም እግል ልሰረት ህዩ መአሰሳት ሃይበት ከደማት ስያሐት እብ ፋዛዐት እግል ልሻርክ

ትፋነው።


እት መናሰበት፡ ምን ሰነት 2003 አስክ 2023 ለህሌት ሓለት ኤች.አይ.ቪ እግል ታያን ዲብ እማት ድራሳት ክም ገብኦ፡ እትሊ ወክድ እሊ ህዩ ለዐደዮ ዲብ 0.3 ክሪት ክም ህሌት፡ ትሸርሐ።

ዲብ ማሕበር ብድሆ ፈሬዕ አቅሊም ዐንሰበ መስኡል አትፋዝየት ወሐብሬ አሰይድ ዐብዱ ዐመር እብ ጀህቱ፡ “ምስል ኤች.አይ.ቪ/ኤይድስ ለነብሮ ጅሃት ምን አገውናይ ሐር እግል ልንበሮ ረሕመት ወፍቲ ንትላኪ” ሐቀ ቤሊ፡ ዐደዮ ሐዳስ እግል ትትከራዕ እግል ልትከደም ክም ወጅብ አፍህመ።

አሽቃል ዐማር እቅት-ሳድ ሀይተተ ሙስተቅበል ለአነጽር

ሙስተቅበል- ክብርም ጸሀይ

እነሱ ለሐላፊ ወክድ አሰክ አቅሊም ጋሽ-በርከ ምዴርየት ሀይተተ እንዲ ተሐረክነ ውሕደት ዐማር እቅት-ሳድ ሀይተተ ወእሸቃለ እግል ልወደሕ እግል ምስል አሰይድ ሄኖክ ጸጋይ መስኡል ውሕደት ዐማር እቅት-ሳድ ምዴርየት ሀይተተ ሃድጋም ዐልኩ። ታምም ጽበጥ ሀድግነ ዲብ እለ ናይ ጥብቦት እግል ንቀድሞ እግልኩም ተ።



አሰይድ ሄኖክ ጸጋይ

እለ ውሕደት ዐማር እቅት-ሳድ ለትከምክሙ አፍረዐት ርኤነ ምንገብኤ፡ ሐርሱ፡ አርድ፡ ማይ፡ ድዋር፡ ትጃረት፡ ሲያሐት፡ ርዝቅ በሐር፡ መውል ውብዕድ ንኣይሸ ነኣይሸ አፍረዐትሙ ተኣደይር። ምናተ ዝያድ ዶር እብ አውቀዮት ለልትርኤ ናይ ሐርሱ፡ ሲያሐት፡ ወንሻጣት ትጃረት ከምስልሁሙ እብ ንኡሽ ደረጀት ናይ ርዝቅ በሐር ዲብ ከዛን ፊስኮ ለከድም ነሻጣት ለአውቁ። እብ ዕሙማይ ናይ ሐርሱ ዶል እንርኤ ህይ ክም ዓማት እተይ ወጠን ዲብ አደቃብ ኣነን ዛይደት ለህለ እሉቲ። እለ መጃል እለ እብ ደረጀት ወጠን አቅሊም ወምዴርየት ለህለ አፍረዓት ውዛራት ከድሞ እቲ ለህለውቲ። እትለ ምዴርየት ህይ እብ ሐርሱ ግሩም ህሌት ምንመ ልትበህል ናይ ሲያሐት ላኪን ልሳዕ ካድም ለሐዜ ለህላቲ። ሐድ መኣሰሳት ናይ ሲያሐት ጀዛብ ጃንብ ለመልክ ምንመ ህለዩ ልሳዕ ሰጅዖት ለልኣትሐዝየንተን። ናይ ሐርሱ ወትጃረት ህይ እብ ዐቢሁ ለልትከደም እቲ ነሻጥ ተ።

ሐርሱ ዶል እምብል ህይ ምዴርየት ሀይተተ ሐድ 4 አልፍ ሄክታር እብ መሰኖ ለገምል ሐርሱ መልክ፡ አሰክ ጣፍ፡ ሐመሊት ወፈዋኪ፡ ዝያድ ህይ እብ በሰል ወጣፍ ዲብ ባካት አለቡ ለህለ እቡ ትትአመር። ናይ ከረም ሐርሱ ህይ አሰክ ሐድ 16 አልፍ ሄክታር ለገብእ እግል ልትሐረስ ለቀድር አርድ ህላ። ሕዲን ዝላም ኢሳድፈ ምንገብኤ ህይ ምኑ ወኪን ብዙሕ አርድ ህለ እግል ልትሐረስ ለቀድር። ምስል ፍርህ ምን አሰሐባብ ባዶብ ህይ ዲብ ክል ሰነት አሰክ 10 አልፍ ሄክታርቲ ዲብ ከረም ልትዘራእ ለህላ። እለ ምዴርየት ሀይተተ ብዙሕ ዶል ሕዲን ዝላም ለሳድፈ ምንማተ ዲብ ዝላም ሰኔት ለትትረከብ እቲ ወክድ ትርበት ግርም ወርዝቅት ሰበት ትመልክ ለሀብከህ ዘርእ ትትከበት ወአድብረ ወጋድሞታት እግል ንዋይ

ለገብእ ሰበር ሰኔ ለገምል እቲ አርድ ቲ ለህለ እግላ። ደግሞ ርኤነ ምንገብኤ ህይ ዝላም ካፍየት ሰበት ዐለት እተይ ሰኔ እግል ልርከቦ ቀድረው። እግል ምዴርየትም እንዲ ገብአው አሰክ ብዕድ ምዴርየት እግል ልዘቤ ለልትለኣክ ረክበው። አሰክ እግል ንዋይ ለገብእ ሰበር ወዐጋብ ለትረከበ እተ ሰነት ዐለት። ናይ ዮም ዐመት ከረም ህይ ዲብ ወሬሕ ጃን ወጃላይ ሕድት ዐለት ዲብ ወሬሕ አጎስት ህይ ግሩም መትመዳድ ወቅያስ ላብ ዝላም ዘልመት። ሰበት እለ መርዔት ንዋይ ሰበር ሰኔ እግል ለአግም ቀድረ ወግያን ናይ ማይመ ማይ እግል ልጽበጥ ቀድረ። ናይ ሐርሱ ከረም ደክል ላኪን ምስል ናይ ደግም ዶል ተኣትረኣዩ ውሕድ ልብል። ርዝቅ ንዋይ ዶል እንርኤ ህይ፡ ምን ዐጣል ወአግን እንዲ አሰብዴክ አሐ ወእንሰ እንዲ ወሰከ ብዙሕ ንዋይ ለበ ምዴርየት ሀይተተ።

ምዴርየት ሀይተተ ምሮ ከዛን ዐቢ ፋንኮ ጽሙእ ለልትበህል ለትመልክተ፡ ዲብ በካት እዳረት ደዋሒ ፊስኮ ለህላቲ። ኩሉ ነሻጣቲ ህይ እብ መኣሰሰት ተዋብ ንዋይ ወዘርእ ለልትደየርቲ። እግል ድዋራት ህይ ምን ኬን መትነፊዶት ማይ ሐለት ጀው እግል ልቀይር ቃድር ለህለ ቲ፡ ሰራይር ወንዋይ ከደን ህይ እብ ብዝሐ ዲብ ባካት እግል ልትፋራ ቃድር ህላ። ምስል እለ ናይ ዓሰታት ዘርእ እንዲ ገብእ ዲቡ ዲብ ባካት ለህለ ሽዐብ ቅዛእ እግል ልርከብ ምኑ ቃድር ለህላቲ። ብዕድ ከም ዓማት ማይ ለልትርኤ ህይ እለ ምዴርየት ለትመልኩ ብዙሕ መሓዛት ምንመ ህለ እብ ዐቢሁ መሓዝ ጋሽ እብ ምግብ እንዲ በትክ ለልሐልፍ መሓዝ ዐቢ፡ ከምስልሁሙ መሓዝ ግራሽ ምን በካት ሐሽንኪት ወአድብር አዳል ለመጽእ መሓዝ ዐቢ ወዲብ ባካት አለቡ ለህለ መሓዝ እንድራይብ ለልትበህልም ምን ምዴርየት ሀይተተ ለትመልኩ መሓዛት ዐባይ እግል ልትሰሚ ልትቀደር። ለህለ ናይ መሰኖ ሐርሱ ጀራዲን ህይ አሰክ ባካት ሰነይ ትበጽሕ እት መሓዝ ጋሽ ለህላቲ ሀይተተ ለትትአመር እቡ። እብ ሐድ ደረጀት ህይ ዲብ ባካት አለቡ መሓዝ እንድራይብመ ጀራዲን እግል ልግመል ቃድር ህላ። ብዕድ እለ ዐባይ መሓዛት ዲብ ዓማት ማይ ናይ አዳም ወንዋይ አነኩ ዐባይ ክምተ ኩሉ ሰካን ምዴርየት ሀይተተ ለልፍህሙ ወልትነፋዕ ምኑ ለህላቲ። እግል ሽዐብ ለገብእ ከደማት ማይ ህይ ምስል እለ መሓዛት

ለልትርኤ ሌጠ እንዲ ኢገብእ እት ለበዝሐ እዳራት ደዋሒ ሕኩመት ክም መሸርዕ እስትቅራር ወሐዶት አውለውየት እንዲ ተህየበዩ ክም ልትከደም ገብኤ። እለ ካድም እለ ሽዐብ እግል ልትነፋዕ ምኑ እብ መቶራት ለትዳለ ዐወሊ ምኑ ክም ልትሰኔ ጋብእ ምንመ ዐለ እብ ሰብ ከራብ ወዐጠል መቶራት ወዲብ ገሌ ህይ ንቁስ እዳረት ለአምጸአዩ ወገሌ ክም እዳረት ደዋሒ ሊብዩናይ ዲብ ለዴል ወመቶራ ዲብ መሓዝ ጋሽ ሰበት ዐለት እብ ውሒዝ ለትገለ ህላ። እብሊ አሰባብ እለ ህይ ሽዐብ ንቁስ ማይ ሲቶ ሳድፋ ጸንሐ። ሰበት እለ ለከሰሰ ጀህት ሐብሬ እንዲ ትህይበዩ ሐል ለረልትረከብ እቡ አግቡይ ልታከው ክም ህለው አሰይድ ሄኖክ ጸጋይ ወደሐ። እብ ዕሙማይ ዶል ልትርኤ ህይ እዳራት ደሕዶት ሀይተተ ለሐሰ ውጃድ ማይ ሲቶ ለረከበ ለህለዩ ክምተን ህይ አትፋቀደ። “እት ሙስተቅበል ዲብ ጣቀት ጸሓይ ሶሃራት ለልትበደል እቡ ህይ ሐል ለሐዜ ህለ” ልብል።

ምዴርየት ሀይተተ ምስል ለህለ እግል ብዝሐ ንዋይ ለህለ ናይ ርዕዮ አግቡይ ሽዐብ ክኣፎ ልትነፋዕ ምኑ ወዲብ ሙስተቅበል ዝያድ እተይ ለልህይብ እቡ እግል በደሎቲ



ልትከደም እቡ ለህለ አግቡይ እት ወደሕ አሰይድ ሄኖክ፡ “እትለ ምዴርየት ሀይተተ ብዝሐ ንዋይ ወለ እብ ደረጀት ወጠን ዶል ትርእዩ ምን ብዙሕ ንዋይ መልክ ለህለዩ መናጥሕ ሕነ እግል ልትበህል ልትቀደር። ምናተ ሕነ ንዛም ርቡሕ ወሐድ ንዛም ርዕዮ እግል ነትአታቲ ገብኣነ ምንገብኤ፡ እለ ብዙሕ ንዋይ ዲብ ሐድ ወርብሕ ለልትረከብ ምኑ እግል ንበድሉ ህሌት እግልኩ። እለ በህለት ዲብ ምሮ እግል ትራቅቡ ለትቀድር ዐደድ፡ ሐሊብ ንዋይክ እብ ዋጅብ ለትትነፋዕ እቡ ወሰገ ንዋይክ እብ ዋጅብ ለትትነፋዕ እቡ

እግል ንበድሉ ህሌት እግልኩ። እትለ ባካት ለህለ ንዋይ ህይ ብዙሕ ወዲብ ከደን ንሹር ለህለ እግል ትራቅቡ ወዲብ መንፈዐት እግል ተውዕሉቡ ለኢትቀድር አግቡይቲ ልትገዩስ ለህላ። እብሊ ግያስ እለ ህይ ተቅይር እግል ልምጸእ ኢልትቀደርኒ። ለበዝሐው ሐረሰቶት ሚልከት ንዋይ፡ መናበራቶም ርኤነ ምንገብኤ ወለ ሐቲ ተቅይር አለባኒ። እብሊ ህይ እግል ልትገዩስ አለቡኒ። ምሮ ሐረስታይ 100 አሐ መልክ ገብኣ ምንገብኤ ታጅርቲ። እሎም ሰብ ንዋይነ ላኪን ምኑ ወለዐል መልኩ እት ህለው ትጃር እግል ልግብኣ ቃድራም ኢህለውኒ። እግልሚ እብ ዋጅብ ልትነፍሶቡ ሰበት ኢህለው። እለ እግል በደሎት ዲብ ሐረሰቶት ትሉሉይ ተዕቢኣት ገብኤ። እግል ልትነፍሶቡ ለቀድሮ ንዋይ እግል ልትብሮ፡ ዲብ ባክ መስከቦብ ወሐርሱም እንዲ ወደው ህይ ክኣፎ ራዑ ወተቡ ዲብ ሐያቶም ህይ ተቅይር ክም ረክቦ ምኑ እግል ለአምሮ እግል ርሐም ወውላዶም እግል ልግብኣ ትሉሉይ ሐብሬ ወምክር ልትህዩብ። ልሳዕ ላኪን አሰክ እለ ለትትሐዜ ደረጀት ብጹሕ ኢህላኒ” ልብል።

እት ምዴርየት ሀይተተ ለህለ፡ መጃል ትጃረት ብዙሕ ዕረጎ

ሰበት እለ ናይ ትጃርት ሩክሰት እንዲ ታህየበው ዲብ መንፈዐት ለኢአውዐለው ማል ለኢአመረው ሰበት ቶም ሐብሬ እግል ልትህየቦም ወምን ከሳር እግል ልድሐኖ ልትከደም እቲ ህላ። ምስል ትጃረት ለገይሰ ህይ ዲብ ምዴርየት ሀይተተ ክልኤ አምዕል ዐዳገ ከሚሰ ወጅምዐት ዲብ ሽብህ መዲነት ሀይተተ ገብእ ወዲብ አምዕል አተሉት ህይ ዲብ ክል ሳምን ዲብ እዳረት አለቡ ልትጋዩስ። እለ ክልኤቲ ሰኔ ብዙሕ አዳም ለሸርክ እቲ ዐደገታትቲ። እብ ፍንቲይ ህይ ዐደገ ሀይተተ ዶል እንርኤ እብ ደረጀት ወጠን እብ እንሰ ለዐቢትተ። እብ ናይ ብዕድ ንዋይመ ለትጃገር ተ እግል ልትበህል ልትቀደር። እብ በዳይዕ መ ርኤነ ምንገብኤ ሀይተተ ናይ ሰለሰ መንገኣት በክት ሰበትብ እብ ሰነይ፡ ፎርቶሳው ወባርንቲ ለመጽእ ናይ መትሐላለፊ አግቡይ ሰበት ህለ ዲብ ደሐን ናይ ትጃረት ሐረከት ለልትርኤ እት ምዴርየትተ እግል ልትበህል ልትቀደር።

ቀድየት አርድ እበ ከሰሰ ህይ ምዴርየት ሀይተተ ናይ ሰከን ተክጢዋ እንዲ ትዳለ ዲብ ሙስተቅበል ክኣፎ ዲብ መንፈዐት ሽዐብ ልውዕል እት ለልብል ጅህድ ገብእ ምንመ ህላ፡ ለዐበ ዲብ ሀይተተ ለልትርኤ ቀድዶት አርድ ላኪን ዲብ ናይ እብ መሰኖ ለገምል ምድር ሐርሱቲ። እለ ሙስተቅበል ለገንሕ አግቡይ እቡ እንዲ ትዳለ ልትከደም እቲ ህላ።

መጃል ሲያሐት፡ “ምዴርየት ሀይተተ ብዙሕ እግል ሲያሐት ለገብእ ባካትቲ ለህለ እግል ክም መስል ደብር ኤሊት ምሮ ምን ቀዳም አሳር ሽዐብ ኤሊት ምን አባዩ እግል ልድሐን ክም ሳትር ልትነፋዕ እቡ ለዐለ ለህለ ዲቡ ባካት ከምስልሁሙ ዲብ አዋራፍ መሓዝ ጋሽ ለህለ ከባሪ ወናይ ዐማር ጀራዲን ምን መዐደዩ ክብሪ ፊስኮ እንዲ አሰብዴክ ለህለ እንዲ ርኤነ ለልትጸገብ ኢኮን። እብ ዐቢሁ ህይ ታሪክ ሰውረት ኤረትርየ ለአሰሰ ሓምድ እድረሰ ዐዋቲ ቀብር ዲብ ምዴርየት ሀይተተቲ ለህላ፡ ምስል ብዙሕ ሐብሬ ለኢልትሃይብ እቡ ዲብ ባካት ጽርግዩ እት ህለ አዳም ክም ናይ ሲያሐት ወታሪክ ክምቲ እግል ልአምር ወልምጽእ ወልትዛየር ልሳዕ ክምመ ለትሐዜ ሸቄይ እቲ ሰበት ኢህለ ታዕቢኣት እግል ልግብኤ እቲ። እብ ፍንቲይ እብ ገበይ ውዛረት እዕላም እብ ሸክል ሰወር ወክቲብ ሓብሬ እግል ልትሃየብ እቡ ምህምቲ” ልብል አሰይድ ሄኖክ።



መደርሰ እንቲ

ሓይላም ቁርክት ርክን ምን ሰጅል፡ ምን እብ ሰበት ታሪክ ለትኩተብ ተጃርብ ንዳል ሽዑብ ኤረትርፍ ለሰላኬ ክታብ ደጀን፡ መሐመድሰዲድ ዑሰማን ለክትባዩ ‘መደርሰ እንቲ’ ለትብል ቅስት እግል ዮም ሓምሳይ ወናይ ደንጎበ ክፈለ እግል ንርኤ፡

አነ ወፋዋነ እት ንትሃጌ ወቅት ሰበት ነሰኣነ ክለን ለእማት ምነ ፈሰል እንዴ ፈግረየ ዐሽለየ ዲብኤ፡ ፋዋነ እንዴ ትግሰኒ “ክእነ ለአትሻቅለክ ለህለ ጋር ሚ ቱ? አሰእለነ እማትክ ሕነ ማሚ?” ትቤ እንዴ ተአትሃድኣኒ፡

“ሕሙም ህለ፡ ትርእያሁ ይህሌክን ገጹ ትጨባለ፡” ትቤ ሐቲ መርዓት፡

ለህግያሆን ሰኒ ወእማን ሀመት ወሰከት ዲብዬ፡ እግል እብ ሒለት ካርዑ ለዐልኮ አናብዕዬ ክምሰል ውሒዝ ምን ረኣሰ እርደት ህርቡብ ደረግግ ገብኣ፡ ለእማት እብ ድንጋጽ እለ ወድየ ትቀዌት ዲብኤ፡ ምሽክለቼ እግል ለኣምረ ወእግል ለአትኣዝማኒ ለትትቀደረን ወደየ፡ ምን ክለን ለተዐቤ ፋዋነ እግል አንሰ ምን ረኣሼ ጠል እንዴ አበለተን ዲብ ነፍሰ እንዴ አትጸግዐተኒ፡ “አብሸርከ! ወልዬ አባይክ ልብኬ፡ ሚ ክምሰል ገብኣክ አሰእለኒ፡” እት ትብል ክምሰል አትኣዝመተኒ ምን መደርሰ ዲብ ጅነ ለትቀየርኮ መሰለ ዲብዬ፡ ለቴለል ክምሰል ርኤኮ ኤማን እንዴ ወዴኮ “ሐጺኤት ከላሺንዬ በዴት፡ እምበሌህ ለክላሺን እግል ትሸቂ ኢትቀድር፡” እቤለ፡

“ሚ ገብኣት አፎ ኢሸቂት? ሐጺናይ ሐቆ ነቅሰ ምነ ሐጺናይ ጀዲድ ወዱ ዲብ፡ ሽዑባየት ሽቅለ ሐጺን ቱ ማሚ፡” እት ትብል በልሰት እቼ፡ ላመ ብዕዳት እማት እግል ጋር እንዴ አቅለለየ ሰበት ረኣያሁ፡ “ደሐን ቱ ወልኩ አሰናይ ሐጺናይ ገብኣ፡ ሕነ ለሐመምክ መሰለ ዲብኩ፡ እሊ ህዩ ቀሊል ቱ” ቤለያኒ፡ እብ ብካይ እት ሀቀብቅብ፡ “አማንክን ቱ እንትን ከአፎ እግል ልትፈሀመክን፡ እሊ ባዲ ለህለ ሚዛን ሐቆ ኢትረከበ እለ ከላሺን እብ ዋጅብ ሀደፈ እግል ትዝበጥ ኢትቀድር፡ እለ ከላሺን እብ ደም ሹሀደእ ለመጽኣት ተ፡ ሕኔት ህተ ትብዴ አነ ምን እብዴ ለሐይሰ” እቤለን ሰእየት ባትክ እት አኒ፡

ሳዕድየ ምነ አንሰ ፍንቲ እንዴ አበለት “እንተ በሰ ኢትሻቀል፡ እለ ምሽክለት ኖሺ እግል እባልሓ ቱ፡ ዲብ ዐድነ ብዝሓም ምሊሽ ህለው፡ ለከርበት ከላሺን ኢልሐግሎ፡ ፈጅር ምኖም እግል አምጽእ እግልካ ቱ፡” ቴለተኒ ምን ብካዬ እሰፍት እት እንተ፡

“እለ እንቲ! መን እግል ለሀበኪ? ‘ተንዚምነ ምን እብረት አስክ መድፊዕ’ ክሉ ሐቲ ልርእዩ፡ ለከርበት ከላሺን

ክምሰለ ህሌት ትሰልመ፡

“እሰታዝ ኢትሻቀል! እብ ቅድረት ረቢ ለዓለሚን ለሐጺናይ እግል ልትረከብ ቱ፡”

ዕንታቼ ሰኒ ወእማን ጀመም አበለ፡ ለእማት ምን ድሩሰን እንዴ በጠለየ እት ለአትኣዝማኒ ምሴተን ትቀደደት፡ ግራዬ ሕሳብ ለተአደርሰ ሰዕዲ ወሃብ ዲብለ እጅትመፅ ሰበት ተአከረት ኢመጽኣት፡ ብዕዳም መደርሰንመ እተ ክምሰልሁ፡ ምሽክለቼ እግል ኢትኣምር ሰኒ ወእማን እግል ትደንገር ትደዴኩ፡ ለምን አርወሐቼ ወለዐል ለእፈትየ ወምሰል



መሐመድሰዲድ ዑሰማን ምን ድማን አወላይ ምሰል ደረሰ ማርየ

አባይ እግል እትሓረብ እበ ለእትዐሽም ከላሺንዬ ለአግደ እምበልሁ ለኢትሸቂ ሚዛን ሰበት በደ እግል ልምጽእኒ ለቀድር መሻክል ክምሰል ዱብ ዐባይ ሰበት ነሰኣክወ፡ ምን ሀላግ ውብካይ በጢር አቤኩ፡ አነ እት ዐንበልብል ወእማት ዲብ ለአትኣዝማኒ አድሕድ ሒልኩ፡ ፋዋነ - እሲት ለዐባይ እንዴ ቀንጾት “እሰታዝ፡ ቅነጽ እግልነ ዲብ ለመጽኣክ እበ ገበይ ዋድቅ እግል ለህሌ ቀድር፡ ክብ በል እግልነ ንሕዘየ፡” እንዴ ትቤ እት ትመርሐነ አስክለ መሓዝ ጌሶት፡ ክልነ እብ ሕበር አሰረ ገብኣኩ፡ ዲብ መሓዝ እንዴ ነሐዜ ለአካን ለዲብ ወደቅት በጽሐኒ፡

“ዲብ እለ አካን ወደቅት፡

በደ ምንዬ መልህያምዬ እግል አትኣምን ለሰዲኒ አሰባብ እት ሐሰብ ለእማት እንዴ መርሐኮ አስክለ ፈሰል ትብገሰኩ፡ ለእማት እብ እንክረን ህሉጋት እት እንተን አሰርዬ ገብኣየ፡

ሳዕድየ እብ መጦርዬ እት ትገይሱ፡ “ስምዐኒ መሐመድሰዲድ፡ እሊ ምድር ክሉ ሐጺን ቱ፡ ዮመቱ ምድርን ምነ እበኩ ፍንጡር ዲብ ለህለ ሐጺን በዜሕ፡ እብ ሰብብ ደርግ ዲብ ዐድነ ሐጺን ኢትሐገለ፡ እመን ወድመን እግል እለ ከላሺንክ ለገብእ ሐጺናይ እግል ንርኩብ ቱ፡ ዲብ ድፈዕ ለህለ ሽዑብ የምኣለቡ ሐጺን እንዴ ጸብጠ እግል ልምጽእ ቱ፡ ምነ እንዴ ሰንከረው እግል

ልውደው ዲብ ቀድር፡ ምናተ፡ አስክ እንረክብ እግሉ፡ እንተ መሰኡሊንክ ኢትአሰእል፡” ቴለተኒ ምን መሻቀለቼ ህልግት ዲብ እንተ፡ እብ ረታዐተ ወቀልበ ለባርህ ዲብ እትዐጅብ እንዴ ይእበልሰ ዲብ ገበዬ አተላላኮ፡

ሰእየት እንዴ ቡተክነ እት ንሄርር እግረ እግል ትትሐጸብ ግረ ታርፈት ለዐለት መርዓት፡ “መሐመድሰዲድ” እት ትብል ትላኬት፡ ሽንኩተ ክምሰል ትወለብኩ፡ “እንክ እሊ ሐጺናይ ግንሐ ህቱ ኢልግበኤ፡” ቴለተኒ፡ እብ ሸፋግ ግረ እንዴ አቅበልኮ ምንዲ ገንሐክዉ ሚዛንዬ ለእግሉ ኢቀዌኮ እት እንቱ ጸንሐኒ፡

ምነ ናይ ማርየ ዝክርያቼ እንዴ ሐሶሴኮ ምንዲ አቅመትኮ

መርየም ወለት አቡዬ እድረሰ አላት ቡን እንዴ ከምክመት ካኑን እት ተሀርሰ ርኤክወ፡

ሳዕድየ እግልዬ ወእግል አቡዬ እድረሰ ድራር እንዴ ተዐግል እግልኩ፡ “ምንክሉ ለዐጅቤ፡ ለሐጺናይክ ክምሰል ትረከበ ነአትኣዝመክ ወነአትሓሌክ ክምሰል ኢጸንሐኩ፡ እናሰ እንዴ ገብኣክ “የለ መጋሲትክን ጽበጠ፡ ቴልከነ እንዴ ተአደፋርሰ፡ አነ እለ ናይ ዮም ሺበትክ እንዴ ኢትገብእ ለናይለ አምዕል ለሀ ብካይክ ልትርኤኒ፡” ቴለተኒ፡ አቡዬ እድረሰ ላኪን ህግያህ አማን ሰበት ይአምሰለየ አምሸሽ ምነ፡ ሳዕድየ እንዴ አትሌት “ናይለ ወቅት ለሀይ ምህሮ ዲብ አየ ልትረከብ? እምበል ንእሽ ዕድር ይዐለ እግልኩም፡ ሰኒ ናጅሓም ዐልኩም፡ አነ እበ ናይክ ድሩሰ

ቅዌት እንዴ አብዴኮ አስክ ዮም እበ እሸቂ ህሌኩ፡ እተ ወቅት ለሀይ ብዝሓት አዋልድ አንሳት ምን ቅዌት ትባልሐኩ፡

አነ ምን ትንክር ዝክርያቼ እግል ዶሉ ምንመ አቅበልኮ ምን ዐድ አድምኖር እንዴ ትሳርሐኮ አስክ መዐስከር ደንደን (አሰመረ) እት ሄርር ዝክርያት አድረሶት እት መደት ግድለ ኢትሓገሌኒ፡ ምነ ሳዕድየ ለአፍቀደተኒተ አምዕል አስክ እለ ቅስት ለአትመምኮ እተ አምዕል ዝክርያት ሄራር ንእሼ እት መደት ግድለ አክለ ሀነ ጀድድ ህለ፡ ክሉ ዲብ ሕጌ ሰውረት (ደጀን) ወግረ ሽጥ-አባይ ለትሰርገለ ዐውቲታት ምህሮ ወለተሐለፈ መታክል ምን ገጩ ኢብዴ፡



“ኤረትሮፖ ኣንሱን ወተብዑትን ሕብር ነዐምረ” ኣሰይደ ከዲጃ መሐመድ ዐሊ

እት ኣሰይደ- መርከዝ ምዳርየት ኣሰማዋ ምን ንኣሽ ለዐቤት እቲ መሕበር ትመርሕ ለሀሌት ኣሰይደ ከዲጃ መሐመድ ዐሊ እብ ክሰሳ ሄራርሊ መሕበር እግል ተሓኪ እነ በክት ረከብኩ። ህቲ፡ ከታቢት መሕበር ወጠን ኣዋልድ ኣንሳት ኤረትሮፖ እት ምዳርየት ኣሰማዋ - ኣቅሊም ዐንሰሳተ። ምን ሰነት 1993 እንዴ ኣንብተት እት መሕበር እምበል ደፍዕየት ትሸቂ ዐለት። ሐቀሁ፡ እት 1998 መክተብ እንዴ ጸብጠት ክም ከታቢት መሕበር ትፋመመት፡ መወዘፈት ወበዐል ማህየት ገብአት።

ከዲጃ ኣሰክ ሕርየት (1991) እት ኣሰይደ ደረሳይት ተ ለዐለት። እት ወክድ ለሀይ ድራሰት ኣሰክ ሳምናይ ፈሰል ነብረት። ሳምናይ ክም ኣትመመት በክት ናይ ኣተላላይ ጨቢብ ሰበት ዐለ ዐደ ሀይ እግል ትትሀይ ምን ሐዘወ ሐያት ደረሳይ እንዴ ኢትወንን ተሀይት። ላኪን እቡህ እት ቤተ ኢትደበአት፡ እም ዕያል ዲብ እንት እት መክተብ ናይሊ መሕበር እብ ለሀ እግል ትትሳይ ኣንብተት፡ ወሐቕ ሐምሰ ሰነት ናይ ለሀ ክድመት ትወዘፈት ወኣሰክ እለ ዲቡ ትሸቂ ሀሌት።

ከዲጃ እብ ትሸርሐ፡ መካሪት ምድር ምዳርየት ኣሰማዋ ኣድብር ለበዝሐ እቲ ወመዋሰላት ለኢልትረከብ እቲ ሰበት ቲ፡ ክም ቀልብ እግል ትንዝም ወትክምክም ውጡይ ምንመ ኢትን እብ ትቀደረት ክሉ ደዋሒሊ ምዳርየት እግል ልብጸሕ ልትጸገም። ምን 08 እዳረት ደዋሒ ናይሊ ምዳርየት ኣሰክ እለ ለኢትክምክም ክልኤ ሀለዩ፡ ወህተን- ሐናብ ወማቀ ልትበሀለ። መካይን ለኢልአትዮን፡ ዶል ሐጋይ እግል ሓዘ ማይ እት ለትፈናተ እዳራት ደዋሒ ለልትፈንጠረ፡ መካሪትን ጽኖዕ ላቲ እዳራት ደዋሒ ተን እለን። ምስል ክል ግድዐቲ ላኪን ምን 43,901 ሽዑብል ምዳርየት 4064 ሰጃላት ኣንፋር ብእቲ።

ከዲጃ ለመሕበር እትሚ ክም ለኣተርግዝ ዲብ ትሸፊሕ “ሽቅልኩ፡ ‘ሾክት ምን ንኣሽ ትብሌሕ’ ለመሰላ ቲ። ለኣንሳይት ምን ንኣሽ እግል ትብሊሕ እግል ንረብዩ ነሐዜ። እት መሕበር ምን ወለት 16 ሰነት ወሐር ቲ ለትትንዝም። ቀደመ-

ላኪን እት ደረሰ መዳርሰ ደረጃት ምግባይት እንገይሱ፡ ዲብ ድራሰን እንዴ ፈደበዩ መትጃግረት እግል ልግበኡ፡ እት ረሐን ደማነት እግል ተሀሌ እለን፡ መስተቅበለን እግል ልትረኣየን ነኣትፋዘዕ። ለጉብኣ እት ሄራረን እርደት ለጉብኣ ኣሸዮኡ፡ እብ ዐደን ልግበኣ ወብዕድ ጀሃት ምን ሀለ ሀይ ንትሰኣለን ወከኣፎ ሐል እግል ልትባሰር እሉ ክም ቀድር ንትጋሚ ምስለን። ኣዋልድ እግልሚ መድረሰት ኢለኣትዮ፡ እት መድረሰት እግል ሚ ለሐምቀ ወእግልሚ ለኣትካርመ፡ ለልብል ሰኣላት እንከፊ እትን” ትብል።



ገሌ ምን ለኣዋልድ ለሸክዩ ምኑ፡ “ጸር ናይሊ ዓይሉት ዲብክ ልትከፊ ገብኡ፡ እማትን እግል ውላድ እግል ልስደወነ ኢልልኣህም፡ እት ቤት ትዕባት እንዴ ዐልነ ፈሰል



ክም ነኣቲ እንጸብዋ ኢሀሌ፡ ቤት ክም ኣቅበልናመ ወቅት ሐፊዝ ይእንረክቡ፡ እንዴ ኢንሐፍዝ ወሽቅል ቤት እንዴ ይእንሸቂ መስኣላት መሕበር ለኣዋልድ

ደዋሒ ሸጋሊ 28 ኣንሳይት ምን ታሰዓይ እንዴ ኣንብተዩ 11 ኣትመመዩ ወዮም ዓመት 12ይ ፈሰል እግል ልትፈተሕ እለን ቲ። ብዕዳት እት መኣሰሳት ሕከመት ሽቅዩ ለዐለዩ እግል ለኣተላልዩ

ለልሐዝያመ ሀለዩ። ለድራሰተን ሀይ መሴሕ ኢተርፈት፡ እት ዐደታት ረውዳት እግል ልትፈተሕ ዶል ተሐዘ እንዴ ትሰጃለዩ ደውረት ገበይ ኣድረሶት ነስኣዩ ወእት ሽቅል እግል ልትፋመመ ልትጸበረ ሀለዩ።

መሕበር ደሐን ወዓፍየት ኣንሳት ደማን እግል ትርከብ ምን ዐበ ሽቅሉ ቲ። ምሮ ምን ምስል ሰብ ሽርከቲ ለተዐወተ እቲ ጋር ሀይ ኣባይ ኣንሳት ነብር ለዐለ ክሸቦ ኣሰረቶት ወኣንሳት ምን ክሸቦ ሐረርተን ቲ። ኣሰክ እለ እግል ልሰረት ለብኡቲ ዐዋዲ ዲራይመ ሀለ። ህዳይ ተሐት ዕምር፡ ክልኣት ዐንቀር፡ ታክሶት፡ ሽደሎት . . . እግል ልትረፍ፡

ክሸቦ እግል ኢልድገቡ፡ ሕጻን እት ንኣሹ ዲብ ዕያደት እግል ልትክሸብ ምስል ሰብሸርከት እንዴ ትሳዳክ ምን ሸቂ ዑሩፍ ኢሀለ።

ፈድል ለጉብኣ ሀለ ኣትፋዘዕ፡ ዮም ወለት ዕምረ 18 እንዴ ኢተምም ለለኣትሀይ ዋልድ ሀለ ለልብል ረኣይ ኣለበ ኣሰይደ ከዲጃ። ምስሉመ ለቃትን እት መዓል እግል ልውዐል መራቀብት ትርድት ትገብኡ። ለወለት ሽሃደት ሚላድ ምንመ ኢተሀሌ ከርት ናይ ፍድኢት እግል ተኣምጽኦ ላዝም ቲ፡ እሉ እንዴ ኢተኣርኤ ዐቅድ



ኣሰክ እለ ልትናበረ እቡ ሀለዩ፡ ገሌ 50 ረኣሰ ምን ኣዱግ ኣሰክ እለ ዓይላት ለኣትናብር ሀለ።

እትለ ኣዜ ሀይ መክናት ክያጠት ሀለ፡ ደርሰ ቃረጮት ልባሰ ወክያጠት ሀይ እብ መሕበር ወሰብ ሽርከት ልትሀዩቡ፡ እብ መሕበር 57 ኣንሳይት ቃረጮት ልባሰ ወሰንጃር (ዓረርት ምላያት) ደርሰዩ። ሲንጃር ሌጠ ሀይ 37 ኣንሳይት ደርሰዩ። ምን እለን መክናት ኖሰን ለወደዩ ወምስል ሰብ መክናት ለትጸገዐዩ 12 ኣንሳይት እት ሽቅል ሀለዩ። ለብዕዳት ሽቅዩ እቡ ለኢሀለዩ መካይን እጃር እት ምዳርየት ኣሰማዋ ኢሀለ ወናይ ኖሰን እግል ኢልትዛበዩ ቅድረቲ ምን ኢረክበዮቲ።

ውዛረት ዐመል ወራዐየት እጅትማዕየት ክያጠት ወቃረጮት ልባሰ ለኣድረሰተን ሀይ 20 እሲት ሀለዩ። መሕበር ወጠን ሽባብ ወደረሰ ኤረትሮፖመ ፍዕሎ ወለዋም ኣሻም ኣድረሰ። እብ ውዛረት ሐርሰ ሽቅየት መገን ኣድሐነት እግል ልትዐለመ ሀይ 100 እሲት ሰጃላት ሀለዩ ወለመሻቀዩ ማጽኦ ሀለ።

ዐማር ጀራዲን እግል ልኣምራመ ጅህድ ገብኡ፡ እት ደዋሒ ኣሰይደ 12 እሲት ሰለሰ ሄክታር እንዴ ተሀየበዩ እብ ተዓውን ለዐምረ ሀለዩ፡ ኣሰክ እለ ከረም እክል ዘረኣ ወሐጋይ ክዳር፡ መንገ ወብዕድ ዕጩ ፈዋኪህ ዋድያት ሰበት ሀለዩ ሀይ ለኣተዩን እት ለሐይሰ ወደማነት ለቡ እት ገብኦ እግል ልምጸኦ እት ሰእየት ሀለዩ።

ኣንሳት እብ እቅትሳድ ረሐን እግል ልቅደረ ሌጠ እንዴ ኢጉብኦ እት ሰልጠት ናይ ደዋሒህንመ እግል ለሀልዩ ለመሕበር ብዙሕ ልትጸገም። ኣክለ እለ ለሐዘቢ ብዝሐ ምንመ ኢበጸሐ፡ እት መመቅረሐት ሽቅል ምን ሰማን ለኣርበዕ ኣንሳት ተን። እት እት ብዕድ ልጃንመ ሀለዩ። ደረጃተን ምኑ ወለዐል እግል ትወቀል ለጅህድ ለበዋር ኢትን።

እት ደንገበ ኣሰይደ ከዲጃ ኤረትሮፖ ኣንሱ ወተብዑት እንዴ ፈዝዐ ወተዐለመ፡ ዐማር፡ ሰላም ወሰያደት ወጠን ዲመ እግል ትንበር ሐቲ እዴ እንዴ ገብኦ ምስል እግል ልሸቂ ፊናህ ሓለፈት።





እዳረት እክል፡ ምን ሕማም ወባልዒን

ሰኣል፡ ከሳር አው ምድረት እት እክል ለወዴ ባልዒን ወሕማማት ሚ መሰል?

በሊሴ፡ አዝረኣት ምን ብቅለቱ እንዴ አንበትን አሰክ ኣተዮቱ እተ ሀለ ወክድ እብ ለትፈናተ ባልዒን ወሕማማት ልትኣዘ። እት ወቅት ኣተዮትሙ ናይ መካዝን ባልዒን ክም ፋንገሲ፡ ሐሸራት ቅንቅን፡ ዐንጹት ወብዕድ ዲበ ኣቲናሁ እክል ምድረት ምን ወዱ ሕያዮም ቶም። ከጥዋት መጋብህቶም ሐቆ ኢተበዐን ህዩ፡ እት እተይን ምድረት እግል ለአጅሩ ቀድሮ። እብ ዓመት ምን ሐምስ አሰክ 30 ምእታይት ለትገብእ ከሳር እግል ለአጅሩም ቀድሮ።

ሰኣል፡ እሊ እግል ንጋብሁ ሚ መትደጋግ እግል ልግበእ ቡ?

በሊሴ፡ ለመትደጋግ፡ ምን ሰልፍን ለእተይ አገድ እግል ልእቱ ቡ። እት ወክዱ ለይአተ እተይ፡ እት ገርሀት ዲብ ሀለ ከርብ ወእዴ ትገብእ እቱ። እት ኣታይ እክል ህዩ፡ እብ ከአፎ አግቡይ እግል ነሐይቡ ክም ወጅብ ስታት እግል ነአፍግር እሉ ብኒ። ሰበቡ ህዩ፡ ለባልዒን አዘዩ እክል ዲብ መካዝን ሐቆ ኣቲናሁ፡ ላዝም ከሳር ሰብብ እትን። ክምሰልሁመ ለመካዝን እክል ቀደም እንከሬ

ዝያድ 65 ምእታይት ምን ሸዑብ ኤረትርዮ ዲብ ወራታት ሐርስ እንዴ ትክሰእ ለልትናበር ቱ። ሐርስ ህዩ ዔዳት እቅትሳድ ናይ ሐቱ ደውለት ቱ። እተይ ካሬ እንዴ ትረከቡ ደማነት ነብረ እግል ትትኣከድ፡ ክል ዶል ወቀይ ወብረት ሐርስ ቱ። እሊ እት ፍዕል እግል ልውዐል ህዩ፡ ምርት ምን ልትከደም ዲብ ሸቅል፡ ወቀሎት ፈሀም ሐረሰቶት እት እዳረት ሐቆ ውቀዕ ለህለ ወቀይ ቱ። እተይ ክም አተ 30 ምእታይት እብ ሰበብ ጊጉይ አግቡይ ኣክቤ አው ከዚን ክም በዴ ብሐሱ ለኣክድ። እት ናይ ዮም ምዕል ዓሙድ ፍሬ-ካድም እዳረት እተይ ሐቆ ወደኒት፡ ምን ባልዒን ወሕማማት ከአፎ እግል ልግበእ ክም ቡ እበ ልብል አርእሱ፡ እት ወብረት ሐርስ መስኡለት ውሕደት ራዐዮት ብቅል አሰይደ ልኡላ መኮነን ለገአት መቃበለት እለ ተሌ ቱ፡ ቅራኣት በኪተት፡

መካዝን ክም ደመነ፡ ዝላም ለልአቀጥር ወዐንጹት ለልአቱ እግል ኢልግበእ ንትኣከድ ምን። ሰበቡ ህዩ ለመካዝን ሐቱ ኢነት ዐንጹት ኣተዩ ምን ገብእ፡ እግል ነአብድዩ ተመን ለአደፈዐን ወለአትዕበኒ። ዝላም ለልአቀጥር ሐቆ ገአመ ህዩ፡ ለእክል ዕሌለ አው ፋንጋስ እግል ሊዴ ቀድሮ። ለመካዝን መጣርቅ ወአግባብ ብእቱ ምን ገብእመ፡ ለገብእ ሕያይ እግል ልእቱ እቡ ሰበት ቀድሮ፡ እግል ንዳብኡ ወጅብ።

ለእግል ንክዘኑ ዱሉይ ለህለ እክል ሐዲስ ልግበእ ወዘርእ፡ ምን ፋንጋስ ወባልዒን ሕር ክምቱ እንዴ ተኣከድን ምን እግል ነአክቡ ወጅብ፡ እብ ቀላል ለልትደመዕ ብቁልያት እብ በይኑ እግል ንክዘኑ ብኒ። እብ ብዝሐ እንክዝን ሐቆ ገብእኒ፡ ፍንቱይ

ለልአፈሬ ሐረሰታይ ህዩ እክሉ እብ ከአፎ ከዘኑ?

በሊሴ፡ እብ ሐድ ቅያስ ለሐረሰታይ ለከዝኑ እክል ልግበእ ወዘርእ፡ ኖሱ አመቱ ለልአምር ወለልትዳሌ እሉ ሸቅል ቱ። ላኪን፡ ምን ባልዒን እግል ልንገፍ ስታት እንዴ ጽብጠ እግል ልክዘን ቡ። ለአግቡይ ከዚን ሕድ መሰል። ለሸባተት፡ እንጋረፊን አውመ ቀፎ ሐቆ ደአንደፍን ወራር ናይ ባልዒን ላዝም ለንታከዩ ጋር ቱ። መብዝሐ አውካድ ሐረሰቶት ነዳፊት መኣከብ እክሎም ሰኒ ለአሙረ።

እት ናይ ለመድ ቀፎታት እክሎም ለከዝኖ ሐቆመ ገአው፡ ለሐረሰቶት እብ ነዳፊት ጸቡጡ ወመዳብእ ወዱ እቱ። ምናተ እት ከራይጥ ወኣክያስ ለከዝኖ ላኪን እት ከዚን እግል ልትደገን ዮም። ውልዋል ለረክብ ዲበ ኣነነት፡

ጠላለት ለኢትኣትዩ ዝፍት ሐቆ ገአት፡ ባሌዕ እግል ሊዴ ለህለ በክት ድሁር ቱ። ሐረሰቶት ለመካዝን ናይለ እክል ለቀዳም ወለእተይ ሓር ምስል እግል ለሓቡሩ አለዮም። ለእክል ለቀዳም ባሌዕ እግል ለራረሩ ለህለ በክት ውቁል ቱ።

ሰኣል፡ ድድ ባልዒን አሰማም ህዩ እግል ንትገፈዕ ወጅብ መኢፋሉ?

በሊሴ፡ ሐረሰቶት ምን ቀዳምም ለላምዳሙ ናይ ለመድ አግቡይ ዳፍዮት ሀለ። መሰለን፡ ቀጠፍ ሚም እት ዕዛል እንዴ አይበሰወ፡ ክም

ከመርት አው ረሲስ እግል ኒዴ ብኒ። ሰበቡ ህዩ፡ እግል ንፈትሽ ወንሕሰሱ ዶል ነሐዜ፡ እብ ቀሊሉ ለልሓልፍ እግል ልግበእ ሰበት ቡ። እት ፍንጌለ አግርበትለ እክል ምሕላፍ ሐቆመ ይህሌት፡ ባልዒን ኣተዩ መኢፋሉ እግል ንድሌ ይእንቀድር። ሰበት እሊ ለአግቡይ ከመርትን ዝዙም እግል ልግበእ ቡ።

ሰኣል፡ ምር እብ ቅያስ ሐድ

እለ ጠሪቀት እለ፡ ምን ወራር



አሰይደ ልኡላ መኮነን

ባልዒን ናይ ምርት ሐል ረህዩት ተሀይበኒ። ቀጠፍ ቡን ጢላንመ ክመ ናይ ሚም እንዴ ደቀቅናሁ ምስል እክል እንክርዩ። እሊመ ባልዒን ለሓርብ እግል። እሊ ናይ ለመድ አግቡይ እሊ ትነፍዐን ምን ገብእ፡ እግል ዓፍየትናመ ምን ምድረት አሰማም እግል ንንገፍ እንቀድር።

መትገፈዕ ድድ ባልዒን አሰማም እቱ ምን ንትሃጌ፡ እክል እት ቤት ሰከን ሰበት ልትከሬ፡ ለእንረሸርሹቱ አሰማም እት አዳም ወንዋይ ምድረት እግል ለአምጽእ ቀድሮ። ሐረሰቶት ምን ለትፈናተ አሰማም እብ መሀረባት ደወ እግል ለአግርህ ቀድሮ። እሊ እግል ኖሶም ወዳይላቶም ለልኣዜ ሰበት ቱ፡ ለገብእ አሰማም ኪማኢ፡ እግል

ልረሸርሹ ዶል ለሐዘ፡ ምክር በዐል መቅደረት ሰኒ ምህም ቱ ወዲመ እንመክር እቡ። ሰበት እሊ ረሸረሹት አሰማም ለናይ ደንጎበ ሐራን ቱ ድኢኮን፡ ምን ሰልፍን እግል ንትጀመል ምኑ ለብና ቱ።

ሰኣል፡ እት ደንጎበ ለትቢለ ፊን ምን ብኪ?

በሊሴ፡ ለኣብያት መካዝን መጣርቅ ለአለቡ፡ እክል ለእንከሬ እቱ አግርበትመ መዳብእ ሰኒ ለቡ፡ በርሚል ናይ 200 ኪሎ ወምት ለልንእሽ እቱ እክልን እግል ንክዘን ሀለ እግል። ለአግርበት ዱቡእ ሐቆ ገአ፡ ባልዒን እግል ነአንቅስ እንቀድር። ምን ቀዳምክ ህዩ፡ ለባልዒን እንዴ ኢመጽእ ዳፍዮቱ። መትደጋግ እት ገርሀት ሌጠ እንዴ ኢገብእ፡ ለእክል እት ኣክቤሁመ ኣትሐዘኖተ ዐቢ ቱ። ዲብ ከዚን ኣካል ሐረሰቶት ለትፈናተ ኣብሳር ልትነፍዶ። ገሌሆም እት ቀፎታት፡ ገሌ ዲብ ከራይጥ ወመሸመዓ፡ ገሌ እት ቅራብ ክም እንጋረፊን፡ ዐሽነት ጥልቅት ወግፈት እቱ ለኣክቡ። ላኪን ከሉ እሊ አግርበት ምን ባልዒን እግል ልክረዕ ኢቀድር። ክእን ሰበት ገአ ህዩ፡ ሐረሰቶት ለባልዒን እግል ልጋብሆ እት ርሸረሽ ደወ አው አሰማም ለኣቱ። ላኪን ርሸረሽ ደወ ምድረቱ ሰበት ትበዘሕ፡ ምን ሰልፎም ሐረሰቶትን እት ጋብሆት ባልዒን እብ ሕሰር ዲብ ነዳፊት እተዮም ቀዳሙ ውሓሩ እግል ልፈደቦ ቱ ወብረት ለትመክር።



ዲቡ፡ እግል ነአንድፋ ወጅብ።

ላኪን፡ እብ ተረርፍ እክል ናይ ሰነት ቀዳሚት ቅንቅን ወባልዒን ብዕድ ለአድመዐዩ እክል ለእብቱ መካዝን፡ እግል ሐዲስ ነኣትዩ ለህሌን እክል እብ ባልዒን ወሕማማት እግል ልመንክል ምኒን ቀድሮ። ሰበት እሊ ክል-ዶል እክል ቀደም ከዚኒ፡ ለእንክዝኑ ዲበ ኣነነት ነዳፊተ እግል ነኣክድ ብኒ። ነዳፊትለ

ከመርት አው ረሲስ እግል ኒዴ ብኒ። ሰበቡ ህዩ፡ እግል ንፈትሽ ወንሕሰሱ ዶል ነሐዜ፡ እብ ቀሊሉ ለልሓልፍ እግል ልግበእ ሰበት ቡ። እት ፍንጌለ አግርበትለ እክል ምሕላፍ ሐቆመ ይህሌት፡ ባልዒን ኣተዩ መኢፋሉ እግል ንድሌ ይእንቀድር። ሰበት እሊ ለአግቡይ ከመርትን ዝዙም እግል ልግበእ ቡ።

ሰኣል፡ ምር እብ ቅያስ ሐድ

እለ ጠሪቀት እለ፡ ምን ወራር

ልብ ንክሬ

- ኣካል ዶል በሽል ለልሀይቡ አሻይር ሰበት ሀለ እሉ፡ እንዴ ኢትኣክሩ ወኢትሸፍን ዲብ ወክዱ እግል ልትብተክ ክልእቱ ቡ።
- ኣካል እበ ዋጅብ አግቡዩ ክም ትወቀዕ፡ ምን ባልዒን፡ ሐዋናት ወጠላለት እግል ትጋብሁ፡ እብ ሻፍገት እት ቤትክ አው መካዝንክ ኣክቡ።
- ሐቆ ውቀዕ፡ ለከርበ እክል ወለሰኒ እክል ፈናትዩ አው ሚምዩ።
- “ ታ ር ፖ ሊ ን ” ለልቡሉ ጅንሰ ፕላስቲክ ክም ንጸፍ እግል እክል ሰኒ ኔፍዓይ ቱ። እክልከ እት ኢነት ውቀዕ ጨበል ክም ኢልትሓበር ዲቡ ትጸገም።



ደማይት ቂዝ ልበ መንቲቱ ጅግል ክሉ ወፊት ክሉ!

እብ መዓወነት ወብረት ሐርስ ለልዳሌ ዓሙድ

ዶ/ር ዑመር ዑስማን

ሻብ ደሚን መስኩበት

“ሰላም ሓቅ ሐዘክ እግል ሐርብ ዱሉይ ግበኤ”፡ “ምድር ሃድእ ሀለ እንዴ ትቤ እምበል ሳትር ኢትትመዬ” እሊ መባልሰ እሊ አማኑ ምስል ወቅት ለኢትቀየረት ናይ ዘበን ቅዱም በሀል ተ። ደሐንክ ወመንገፎአክ ለለአደምን ድፈዕ ሽቅየት ምህም ክምቱ ለለአሸርመ መሰል።

ሳትር አው ድፋዕ ልትበሀል እት ሀለ እት ምድር ለተሐፈረ፡ ሽግ ኢኮን። አግዳ መንገፎ ለለአደምን ክምኩም ትርድሽ ሽዑብ እት ገብእ ምለዓል ክሉ ሳኪን ዐቅም ወመቅደረት ሻብ ገቢል እት ነዘሞት ወመዳልይት ልትንከብ። ዐድነ ሕር ወሲያደተ ለአድመነት ሐቅ ገብኢት፡ እትለ ሐልፈየ 34 ሰኖታት ለጋብሀቱ ንዳል አጅል አድመኖት ስያደት አክለይ ክቡድ ክምቱ ርእያሙ ሀሌ። እትለ ለሀሌነ እቱ ወቅት ህዬ ቀር አፍሪቀ ለሀለ እተ ሓለት ዛያድ ድራሰት ተሀይበኹ።

ሲያሰት ወመንገፎ ሓለት ቀር አፍሪቀ ወቅይሕ በሐር፡ እተ ክምስልሁመ ምን ቅሩብ ተአሲር እግል ልውዴ እትነ ለቀድር ምግባይ ምፍጋር ጸሓይ ከአፎ ሀሌት እንቤ ምን ገብኢ፡ ኢረኪብ መንገፎ ወደሐን አክልአይ ምን ጸብር ክም መርር እግል ንፍህም እንቀድር።

ቅያሰ ለአለቡ አርወሐት አዳም ለአፍነ ሐርብ የመን፡ ሐርብ ሕድ ሕድ ግብለት ሱዳን ወየመን፡ እት ክሉ እንክራት እሱብየ ለሀለ ሕሩብ ሕድ ሕድ ወጄራነ ለቱ ምግባይ ምፍጋር ጸሓይ፡ ሊብየ፡ ሱርየ፡ ዕራቅ ወብዕድ ለገብእ ሕሩብ ወለሰበዩ ፈነ አዳም ወከሳር ማል፡ ወእብ ሰበቱ ለጀረ ሀገጋይ እቅትሳድ ወመትፈንግር መሕበራይ ነቢር፡ ሕግላን ወልጃእ ገባይል ኦብ ቀሊል ለልትወገም ኢኮን።

ሽዑብ እርትርየ ደማን ለበ መንገፎ ወደሐን ለመልክ ገቢል ምንማቱ፡ እብ ሰበት ናይ እሊ እነብር እቱ ለሀሌነ ደዋይ ቀር አፍሪቀ ወምግባይ ምፍጋር ጸሓይ ተአሲር እግል ልውዴ እትነ ላዝም ተ። ናይ በረ ቅዋት እግል ሐሽም አሱብየ እንዴ ገበረው፡ ሰላም ገቢል እርትርየ እግል ለሐምር፡ ስያደቱ እግል ለኪዶ፡ ናይ ከርስ ውሕደቱ እግል ለሐምር፡ ናይ እቅትሳድ ወዐማር በርናምጃት እግል ልቀይዶ፡ እብ ረቃቅ ገበይ ልጃእ፡ ፍክር ዳርሳም ውላድ ዐድ

አስክ ካርጅ እብ አውሐዞት፡ ሐለት ወመቅደረት ወላድ ዐድ እግል ልጃሙም ለወድዉ ዐለው አከይ ፍዕል ወዋይዲባት እግል ልትዓለብ ለልትቀደር ኢኮን፡ ወአዘመ እብለ ትወቀለት ገበይ ለአተላልዉ ሀለው። ልግቢ ደአም እሊ ክሉ አከይ አፍዓል ምስል ክሉ አጅናሱ ወትምኔት ዌድዮቱ እግል ልትመም ኢቀድረ። መደራት አጀረ እንዴ ኢኮን መባጽሐ ኢአግደ። እብ ከአፎ እንቤ ምን ገብኢ፡ ለበሊሰ እሙር ተ።

ሽዑብ እርትርየ እብ አጅለ ህቶም(ሰብ እኪቱ) እግል ልምሎኩ ለኢቀድረው፡ ናይ ሲያሰት መቅደረቱ፡ እተ ረዩም ወመሪር ንዳሉ ለጠወረዩ ናይ ተንዝም ቅድረቱ ውሕደት ገቢሉ፡ ናይ መዳፍዓት መቅደረቱ፡ እትለ ሐልፈየ 34 ሰነት እት ሽዑብ ለወደዩ ወዓይ ወአትፋዝዖት፡ ተንዝም ወናይ ዕስክርየት መቅደረት ውበዕድ እግል ክሉም ለተሐሰበው አከይ ውዳያት ወዋይዲባት ክም መክኖ ወደዮም። እግል ናይ በረ አከይ ዋይዲባት ወሸሩር እግሉ ባብ ሰበት ኢክፍተ ዝኖሩ ወመዳላዩ ሰበት ኢፈትሐ መንገፎህ ወደሐኑ እግል ለአድምን ቃድር ሀለ።

ምንለ ሐልፈ ተጃራብነ ክመ ደረሰናሁ፡ ለናይ ታሪክ አባያም፡ አዘመ እበ ሽዑብ እርትርየ እኩዱ ለሀለ ናይ ከርስ መንገፎ ደሐን ወእብ ቅድረቱ ደሐን ለብእቱ ደዋይሕ እግል አምጸኦት ወድዩ ለሀለ ካድም፡ ርይሓም እግሉ እግል ልግበእ ኢቀድር። ሰበት እሊ ዋይዲባቶም እብ ለትፈናተ አግቡይ እግል ለአተላልዉ ክምቱ አኪድ ተ።

ሰበት እሊ ሽዑብ እርትርየ ክም ሜርሓይ ወሕጌ ገቢሉ፡ እግሊ እሊ



ሓላት ደዋይሕን እብ ፋይሓት ርእየት ምን ቁሪናሁ እብ ፍሂም፡



ወአስክ እለ መንገፎን ወደሐን እግል ንብጸሕ ለሰዴነ ዓዳትነ፡ ሰሙድነ ወነባሪነ እንዴ አተረደ እብ ጽብጠት ወአተረዶት፡ ምኑ ለልጠለብ ክሉ ናይ እለ መርሐለት እብ ወቃዕት እግል አትመሞት ናይ ሲያሰት ፈሀሙ ወፈዛዐቱ ሌጠ እንዴ ኢገብኢ ናይ



ዕስክርየት መቅደረቱ ወመዳላዩ አተረዶት ክም ለአትሐዝዩ አኪድ

ልትአከድ ለዝም ገብኢ። ወርሳይ አማነት ላቱ ሻብ፡ እሊ ክቡድ ሽቅል እግል አትመሞት ፈዛዐት ወክምክምት መቅደረት ሰበት ለአትሐዝዩ፡ እት ረበዮት ወአንሸኦት ሽዑብ ብዘሕ ካድም ገበኢ።

እግል እሊ ምህም ጋር እግል

አትመሞት ምን ፈገረ ኤታናት ዎር፡ ክድመት ወጠን ተ። መባጽሕ ክድመት ወጠን “ሽዑብ ለዴማቱ ለለአደምዕ ቅዋት ድፋዕ ብንየት፡ ለእት ወቅት ንዳል ለነሽእ ዓዳት ወለመድ እብ ዓቂብ እትለ መጽእ አጅያል ሓሊፎት፡ ሽቅል ለፈቱ እብ አደብ ለትበነ ጀዲድ ጂል አፍሪቶ፡ ቅድረት አዳምን እብ ዋውርት ወለትዝመት ገበይ እት ዓማር ዐድ አውዓሎት፡ ውሕደት ገቢል አተረዶት ወሐር ለበልሰ አፍካር ድድ ወጠንየት አብደዮት ወእት አክር ውቅል ውሕደት ገቢል አከዶት ተ።”

እርትርየ እትሊ እብ ኢረኪብ ሰለም ወመርህዮ ልትወዘብ ለሀለ ቀር አፍሪቀ እት እንተ፡ ደሐን ወመንገፎ ሽዑብ እንዴ አድመነት እግል ክቡድ ዋይዲባት ወአከይ ፍዕል ግዳም እግል ትጋብህ ለሰደዩ፡ እሊ ለእብ በርናምጅ ክድመት ወጠን ለትበነ መቅደረት ወውሕደት ሽዑብ ተ።

ክሉም ሽዑብ እርትርየ እብ በርናምጅ ክድመት ወጠን እንዴ አትመመው፡ መቅደረት ዕስክርየት፡ አካዳሚ፡ ምህነት ውበዕድ እንዴ ደርሰው እት ሽቅል እድንዩ ለልትፈረር እብ ግብኡቶም፡ እግል

ክሉ ድንገር አፍካር እንዴ አብደው ዋውር ሽዑር ወጠንየት ክም ለሀሌ እግሉም ወደ። እሊ ሌጠ እንዴ ኢገብኢ ዐድነ እት ለገእ ወቅት ደሐነ ወመንገፎህ ለለአደምን መቅደረት ዕስክርየት እግል ለሀሌ እለ አቅደረ። “ሰላም ሐቅ ሐዘክ እግል ሐርብ ዱሉይ ግበኤ ለልብል ፍክር” እት እርትርየ እብ ዋቅዕ ፍገራት ክምቡ ተአክደ። ቀራር በርናምጅ ክድመት ወጠን ፈግር እት ሀሌ፡ እት ፍንጌ እርትርየ ወእሱብየ ለገእ መሻክል ይዓሌ፡ ወእግል ልምጸእ ቀድር እንዴ ቤለ ለለሐሰብ ነፈር እግል ለዐሌ ኢቀድር። እንትበህ ክድመት ወጠን እት ዓማር ወጠን ውብንዩት ለካርበት ዐለት ዓድ፡ ረበዮት ለመድ ሽቅል፡ ወዋውር ውሕደት ገቢል ለለሐፍዝ ሽብ እት ብንዩት ተ ለዐለ።

ልግበእ ደአም ሐሽመት አዲስ አበባ፡ እት ረአሰ እርትርየ ወራር ክም ዐለነ፡ ሳወ ለደረቡቶም ወረቤቶም ዌርሰት ለቶም ሽዑብ፡ እብ ለተአትፈክር ፍርስነት ወወጠንየት፡ እግል እብ ብዘሕ ናይ ማል ወሐብሬ ተአሚናት(ሰለየ) ሰደየት ድቁባት ድወለ ለዐለት እግሉ፡ እርትርየ ክም ደውለት ምን ከሪጠት ዐለም እግል ልሕክክ እሙም ለዐለ ወራራት እንዴ አፍሸለው፡ ሲያደት ወጠን እት አከዶት ቅያሰ ለአለበ ተረት አግደው።

እሊ ክሉ ሰኒን፡ አስክ እለ እግል ክሉ ዋይዲባት ካርጅ እግል ንጋብህ ወእቱ ንትዐወት ለአተቅደፊን ምን ለሀሌ በርናምጅ ክድመት ወጠን ተ። ሽዑብ እርትርየ መዋመሞርለ ናይ መዳፍዐት ዋጅቦም፡ ለእግል ብነ ወተዕሚር ምህም ላቱ አሳሰ ብንዩት ትሕትየት እት ከራ፡ አምሮም፡ ቅድረቶም፡ ሐለቶም እንዴ ትበረወው ወቀደም ናይ ነፍሶም ወዓይላቶም መስለሐት ወመንገፈዐት ገቢል እንዴ አቀደመው ብዘሕ ክድም ወደው ወልሳዕ ዋውር እርትርየ እግል አምጸኦት እምበል ሕላሌ ላሊ ወአምዕል ከድሞ ሀለው። ሽረፍ፡ እሕትራም ወሐምዴ እግል ደሚን መንገፎን፡ ደሐነ ወመትቀዳምን ላቱ፡ ዌርሳይ ቃሊ ነባራ፡ ሐበን ሽዕቡ ወደውለቱ ለቱ እርትሪ ሻብ።

ወለም እግል ትቀይርሰልፍ ነፍሰክ ቁይር

እት መደት ቅድምት መልክ ሰኒ መትመክሕ ወፎጃጅ ነብር ዐለ። እሊ መልክ ዲብ እድንዩ ምኑ ወለዐል ቅድረት ለቡ ነፈር ክምሰል ይህለ ለአምን ሰበት ዐለ እብ መትፎፋል ወምክሖ ምድር መንከለ። ክትር ጀኣረቱ ህዩ ዐለም ክለ እንዴ ቀየረየ ዲብ ሐንቲ ምልክ- እግል ለኣትየ ሐሰበ።

ሰታቲባቲ እንዴ ኣዳለ ህዩ ዐለም እግል ልቃይር ባሰረ። ምናተ፡ ዐለም ክምሰለ ህቲ ለለሐዝዩ እግል ልቀይረ ኢቀድረ። ደለ እበ ጌሰ መታክል ከርዐዩ። ቲለል ክምሰል ትሰደደ እቲ ዐለም እንዴ ኣዝመ ምነ ህቲ ለነብር ዲበ ቃረት እግል ልቀይር ጀረበ። እላመ ኢሰልጠት እግሉ፣ ክሉ ኣፍካሩ ፈሸለ ምኑ። ምነ ቃረት ክምሰል ተሐለለ ህቲ ለነብር እተ ደውለት፡ ክምሰለ ህቲ

ለለሐዝዩ እግል ልቀይረ ባሰረ። እላመ ኢትቀየረት፣ ደለ እበ ወጠነ ኣቤት እግሉ።


እሊ መትመክሕ መልክ ምነ ደውለት ክምሰል ተሐለለ ድዋራቱ እግል ልቀይር ስታት ኣፍገረ። ዲብ እሊመ ፈሸለ። እት ደንጎበ እሊ ክሉ እንዴ ኣዝመ ምኑ፡ እሰልፍ ዐይለቱ እግል ልቀይር ኡተነ። ዐይለቱ እብ እንክርም ክሉ ህቲ ለለሐሰቡ እግል ልገበእ ክመሰል ኢቀድር እንዴ ኣሰኣለወ ፈነዋር ገብአው ምኑ። ሐቆ እሊ ምን ክሉ ሕልሙ ወኤታኑ መሎስ ክምሰል ተርፈ። እንዴ ደግለለ ወትጀክለለ በዐል ዐራት ገብአ። ክሉ እግል ልቀይሩ ስቲት ለዐለ በርናምጅ ክምሰል በጠለ ምኑ ህዩ በኑ ለኣስተንትን ዐለ።

እሊ መልክ እብ ፈሸለ

እንዴ ለኣስተንትን ሐቲ ፍክረት መጽኢተ። ህተ ህዩ፡ ህቲ ዐለም፡ ወጠነ፡ ድዋሩ ወዐይለቱ እግል ልቀይር ጀረበ። ምናተ፡ ቀደም እሊ ክሉ ነፍሱ እግል ልቀይር ኢወጠነ። ሰበት እሊ ብዕዳም እግል ልቀይር እንዴ ኢጀርብ እሰልፍ ኣርወሐቱ እግል ልቀይር ክምሰል ዐለት እግሉ ፈሀመ። እግል ውላዱ እንዴ ትላክ ክእነ ቤለዮም።

“ውላጄ፡ ኣነ ዐለም እግል እቀይር ብዘኣ ተሐለምኩ፣ ምናተ እሰልፍ ርሕዬ እግል እቀይር ክምሰል ዐለት እግልዬ፡ ዮም ዲብ ኣፍ-ሞት ክምሰል በጽሐኮ ኣመርክወ። ሰበት እሊ ለገብኣ ነፈር፡ ኣዳም እግል ልቀይር እንዴ ኢጀርብ እሰልፍ ርሐ ልቀይር። እብለ እትፋኒኩም፡ ወደሐንኩም።” ሐቆለ ቤለዮም ቤት ኣማኑ ኣተ። 3/12/2025

ገሌ መዕሉማት እብ ክሰሉስ ልብ ወብዕድ ከፈፍል ገሮብ ወድኡዎ



ዓመት እሊ ለተሌ ጠባይዕ ወፍንቲት ህለ እግሉ።

- ልብል እብ ምግባይ ተቆይም እት ደቂቀት 72 ዶል ለህንድግ።
- እብ ወግም 66 ሰነት ለወደ ነፈር ዲብ ሐዶቲ ታመት ልቡ 2.5 መልዩን ዶል ለህንድግ።
- ከባደት ልብ ኣዋልድ ኣንሳት ምን 250 ኣሰክ 300 ግራም ገብእ።
- ከባደት ልብ ሰብ ተብዕን ምን 300 ኣሰክ 350 ግራም ልትመዘን።
- ልብ ዲብ ገሮብ ኣዳም እግል ክለ ሙነት ክምሰል ከረ ፕሮቲን፡ መዓድን፡ ሺታሚን፡ ሽብሕ ወብዕድ፡ ጽቡዋ ለጸረ ደም ወዘዕ።

- ዐልቀት ዲብ ርሕም ክምሰል ተሐነነ፡ ሐቆ 21 ኣምዕል ልቡ እግል ለህንድግ ለኣነብት።
- ሀንደገት ናይለ ልብ ተኣነብት እት ህሌት እብ ሽብህ ሀንደገት ናይለ እም ተኣነብት። በህለት፡ ምን 75 ኣሰክ 80 ዶል እት ደቂቀት እንዴ ኣንበተት፡ ለሕነት ኣክለ እት ለዐቤ ጌሰ ዲብ ትወሰክ ትገይሱ። ምን 165 -185 ዶል ዲብ ደቂቀት ትበጽሑ።

እሊ ዲብ ኣርበዕ ለልትከፈል ልብ፡ ዲብ ሐዶት ለኣግደ ወሰኒ ኔፍዓይ ክፋል ገሮብ ቲ። ምናተ፡ እብ ሕማም ትደምዐ ምን ገብእ ላተ፡ በዐሉ እብ ኣመተ ኢትኣመረት ህፍሽ ሰበት ልብል ሕማም ልብ ለዐም ኣንፋር እግል ልትደገጎ ለኣስትህል።

- እት ክል-ኣምዕል 400 ከፋሊት ናይ ደም እብ ገበይ ከላዊ እንዴ ኣበለ ነድፍ ወልትወዘዕ
- ሰራብሉም ለልትበህል ክፋል ናይ ሐንገል 85% ምነ ሕንገል ጸብዋ።
- ኣጀኒት እንዴ ወቀልክ ቀርኣክ እግሉም ወተሃጀክ ምስሉም ምን ገብእ ሐንገሉም ልትጠወር።
- ኣምዒት ርሒብ ዲብ ሰለ ክፋል ልትከፈል። ክል-ክፋል ህዩ ናዩ ወቀይ ህለ እግሉ።
- ዲብ ከርሸት ኣዳም ለልትረከብ ኣሲድ ዐጭም ናይ ደወርህ እግል ለኣቅቅ መቅደረት ህሌት እግሉ።
- እብ ብዝሐ ሐሊብ ሰትዩት ዲብ ከላዊ ደረር እግል ልብብብ ቀድር።
- ሐንገል ወድ-ኣዳም ሐድ 500 ትራልዮን ኡቶምስ ጸብዋ። እሉም ኡቶምስ እሉም ዲብ መማኒ ናይለ ሐንገል ምህመት ዐባይ ህሌት እግሉም።

ልብ ዲብ ክሉም ሒዋናት ለልትረከብ ዲብ ገሮብ ደም ለወዘዕ ለኢትበዋር ሐረከት ለወዴ ገሮብ ቲ። ልብ መቶር ናይ ሐዶት እንዴ ትበህለ ልትሰሜ። ሐረከት ዲመ ለትሄርር ወለኢ ተኣትካርም ፍንቲት ሐረከት ቲ። ልብ ምነ ብዕድ ገሮብ እንዴ ልንእሽ ለትወቀለት ክድመት እግል ኣርወሐት ለህይብ። ልብ እበ

ምን መባልስ ለባም

- ልብ ግራብ ቲ። መድብኡ ከናፍር ገብእ እት ህለ፡ መፍትሐ ህዩ ንሳል ቲ። ሰበት እሊ መፍቲሕ ምስጢርን ንሳል ሰበት ገብኣ መባልስ ንሳልን ኣመቱ ንውዴ።
- ኣዳም ልትፈናቲ፡ ምን ሕድ ለፈንትዩ ህዩ እብ ክሰሉስ ጋራት ለህለ እግሉ ረኣይ ቲ። ለዎሮት እንዴ ኣጭበበ ልርእዩ እት ህለ፡ ለካልኣይ ህዩ እንዴ ኣርሐበ ልርእዩ። ሰበት እሊ ኣዳም እብ ተፍኪሩ ልትመዘን።
- ናይ ሰልፍ ከሳር ናይ ዲመ ዐውቲ እግል ትግበእ ትቀድር፣ ምናተ ለከሳረት ለቀይመ ተሐዘ። እግለ ሰኒ ቀየመየ ዓውቲ ዳይመት ወእግለ ኢቀየመየ በዓ ዳይም ክምሰል ተ እግል ነኣምር ወጅብ።
- ዐውቲክ እግል ዐውቲ ለብኩተ ሸንህት ተሐድደ። ዐውቲ ወለት ሸንህት ዛይደት ወወለት ወቀይ ትሩድ ቲ፡ ብዕድ ምስጢር ኣለቡ።
- ክሉም ለእባም ተሐልፍ ተዩልል ሰዱዳም፡ ነፈር ታምም ወዱከ። እለ ዮም ለህሌካህ መርሐለት ፍገራት ናይለ ቀደም እለ እት ተኣምር ወእንዴ ኢተኣምር ለሐለፍካህ መራሕል ቲ። ሰበት እሊ ዲብ ብዕድ እንዴ ኢተኣመስምስ ቀዳሚትክ ኣትዋይን።
- ኣዋልድ ኣንሳት እግል ሰብ ሰኒ ልፍህማሆም፣ ምናተ፡ ህተን እምበል ኣንሰ ኣክልሕድ ለልፍህመን ይህለ።

Improve your English

Misused forms

Have another look at:-
The use of the gerund
The gerund (and not the infinitive) should be used:

1. After prepositions.
Examples: He worked without stopping. She played instead of working.
2. After words which regularly take a preposition, such as fond of, insist on, tired of, succeed in.
Examples: I am tired of doing the work again. He succeeded in killing the tiger.
3. After certain verbs, such as avoid, enjoy, finish, stop, risk, excuse.
Examples: boys enjoy playing football. The wind has stopped blowing.
4. After the adjectives busy and worth.
Examples: he was busy writing a book. This date is worth remembering.
5. After certain phrases, such as it's no use, it's no good, I can't help, would you mind, look forward to.
Examples: I think it's no use trying again. I can't help feeling angry about it.

The gerund or the infinitive can be used after certain verbs, such as begin, like, dislike, hate, love, prefer.
Examples: he began to talk or he began talking.

Common mistakes in English

1. It's no use + ing.
Don't say: It's no use to cry like a baby.
Say: it's no use crying like a baby.
2. It's no good + ing.
Don't say: it's no good to get angry at once
Say: it's no good getting angry at once.
3. Look forward to + ing.
Don't say: I look forward to see him soon.
Say: I look forward to seeing him soon.
4. There is no harm in + ing.
Don't say: there is no harm to visit him now.
Say: there is no harm visiting him now.

THE USE OF A WRONG TENSE

5. Using the past tense after "did" instead of the infinitive without "to."
(a) To ask questions:
Don't say: Did you went to school yesterday?
Say: Did you go to school yesterday?
- (b) To make negations:
Don't say: I did not went to school yesterday.
Say: I did not go to school yesterday.

- After the auxiliary "did" the present infinitive without "to" must be used, and not the past tense of the indicative.
- Note: The answer to a question with "Did" is always in the past tense: as "Did you see the picture?" – "Yes, I saw the picture": or "Yes, I did."

School Jocks

A gentleman wanders around the compound of a school looking for the library. He approached a student and asked, "Excuse me young man. Would you be good enough and tell me where the library is at?" the student, in a very arrogant and belittling tone, replied, "I'm sorry, sir, but at this school we are taught never to end a sentence with a preposition!" the gentleman smiled, and in a very apologetic tone replied, "I beg your pardon. Please allow me to rephrase my question. Would you be good enough to tell me where the library is at, idiot?"

ጀላል ነቅፈ ማሌ ወዮም እበልብል አርእሱ፤ ምስል ገዳይም ውላድ ነቅፈ ላቶም እብ ክርን ለገብአት መቃበለት ወዲብ በርናምጅ ፊድዮ እብ ከፈፍል ለፈግረ፡ ነቅፈ ማሌ ሚትመስል ዐለት፡ መንበረት አዳመ፤ ንዳቅ አብያተ፡ አደብ ወሕድርኖት ውላድ፡ ዲብ ነቅፈ ለዐለ ግዛም ተዕሊም ክምስልሁመ አደብ ወእክላቅያት ደረሰ ወምደርሲን ለከሰሰ 5ይ ክፈል እግል ንርኢቲ፡ ከቅራኣት በኪተት።

ዮም ሐቆ ዝያድ ሰብዒን ሰነት እብ ሰበት ተዕሊም ዲብ መደት ሕክም ፈደራሊ ንትሃጌ ዲብ ህሌነ ኣነ እግል ኖሼ ለሳደፊኒ ጀዘ አው ዕቁበት ህሌት ምንገብእ ዲብ ህግዩ እንግሊዝ ቲ። ኣዜ ዲብ ህግዩ እንግሊዝ ዐሚ መሐመድዐሊ እግላ እዳክ እንዴ ጸብጤ፡ ኣስክ ከዋክብ አደሐ ልትረኤክ እብ ሕረጽ ሸወውዋ ወዳክ፡ እትለ ኣነን ለኣዜ ጀራዲን ብእተ እተ ወክድ ለሀይመ ጀራዲን ዐለ እተ። እሊ ጀራዲን እሊ እግል ብለዕ ፈቀዋ ኢኮን ለዐለ፡ ለመደርሰ ናይ ዝራዕት አው ሐርሰ ሕሰት ሐርሰ እተ ለሀይብ እቲ ወክድ ዲበ ጀራዲን እንዴ ጌሰ እብክ እብ ፍዕል ለአደርሰን ዐለ።

አማንቲ ለዲብ ዘበን ሕክም ፈደራሊ ለዐለት ድራሰት ትርድት ዐለት። እብሊቲ ዮም አቡነ መሐመድ ከንቲባይ ሐሰን እተ እሊ በልሰ ህግዩ ከሊማት እንግሊዝ እንዴ ይኣተ ኢልትሃጌ። እሊ ህዩ ለወቅት ለሀይ ወለ ደረጀት ጃምዐት ምንመ ኢበጽሕ፡ ለዲብ ነቅፈ አስተብደዩ መድረሰት አክል አዩ ትርድት ክምስል ዐለት ምን መባልሱ ትፍህሙ። ኣዜመ ናይ ክምሲናት ደረሳይ ለዐለ አቡነ መሐመድ ዐብደላ ዲበ ድራሰት ዲብ ወሰክ ክእነ ልብል፡-

“አወል ኣነ መሐመድ ለደረሰነ እቲ ወክድ ዎሮቲ፡ ዲብ ክልኣት ፈሰል ምንመ ዐልነ። ኣዜ ኣነ ዲብለ መሐመድ ለሓኬ እቲ ለሀለ ዘበንቲ ዲብ ነቅፈ እደርሰ ለዐልኩ። አወል ሕነ ለሙዲረ መድረሰትን ቲጃኒ ለልትበህል ሱዳኒ ቲ። ክምስልሁመ ከረ እስታዝ መሕሙድ ሕሴን ካፍል ዐለው። እሎም መሐመድ በደው ምኑ መሰለኒ ኢሀድገዮም። ኣዜ ሕነ ለመደት ለድራሰት አስተብዳነ ዲበ ዲብ ነቅፈ ከልወት መጽኣት። ለከልወት ክምስል ትፈተሐት ክሊነ ዲበ ከልወት ገዐዝን መድረሰት መሰከበ በርሰሰ። እሊ ክም ሐሰሰ ዐሰማን ህንቶላይ ለልትበህል ምን ጅማዐትን ዲበ ከልወት እንዴ ጌሰ እንዴ ነሰኢን ዲበ መድረሰት አብጸሐኒ። ወእብለ ዲበ ወክድ ለሀይ ጆጠት ሐሰለት። ኣነ አቡዬ ዲበ መድረሰት እንዴ መጽኣ “በሰ ኣነ እሊ ወልዬ ምን መድረሰት ለከልወት ተሐደሰ እቲ ምን እመይት ያሲን ቀርእ እቺ” ዲብ ልብል ትረጀዮም። ወምን መድረሰት እንዴ ነሰኢኒ ኬን ዲበ ከልወት በልሴ። እሊ ወክድ እሊ ሕሴንመ ቀበውኒ እንዴ ቤለ ደርብኒ ጌሰ።



አሰይድ መሐመድ ዐብደላ እድረሰ

ሐቆ እሊ ልጅነት ከወነው። ወለልጅነት ክምስል ትከወነት፡ ክሉ ለከልወት ወለመድረሰት ሕድ እበ ኢተኣዜ ገበይ ክሉም ለጠለበት ምስል እግል ልቅርእውን ትዋፈቀት። ወእብለ ሰብ ገጽለ ዐድ እሊ ህዩ ለአንፋረ ልጅነት እሎም አጀኒትን ምን መድረሰት ኢነሐርሞም፡ ወምን ከልወት እብ ተርተረት ከልወቶም መድረሰቶም ልቅረኦ ለልብል ቀራር ሓሰረት። ክላሰ ክእነ ክምስል ገብኦ ለሰብለ ገጽ ከረ ከሊፈ መሐመድ ዐብደላ ወብዕዳም ዋፈቀው። ሕነ አሰቡሕ ሐቆ ሰላት ከልወት እንገይሰ ወሳዕት ሰማን ምን ከልወት ክምስል አቅበልነ ጠዋሊ መድረሰት እንገይሰ። ለመድረሰት ክምስል ዮም መዐደይ ሕሊል እንዴ ኢትገብእ ሰምዋ እሊ መንተዘህ ሸባብ እቲ ዐለት። እሊ መድረሰት እሊ ዲብ ዘበን እንግሊዝ ለዐለት መድረሰት ቲ። እተ መደት ለሀ ደረሰ እብ አደብ



አሰይድ ከንቲባይ ሐሰን

ሼክ ለልትበህል ደረሳይ ክምስል ዘሀጀ ምን መድረሰት ሀርብ ከኬን ቀጣብ ለልትበህል ባካት ሼክ ለዓል ጌሰ ከተሐበዐ። ለወክድ ሙዲር መድረሰትን ለዐለ ቲጃኒ “ጌሶ ከአምጽወ” ቤሌን ወጊሰነ ከመጽኣነ እብ። ክምስል መጽኣነ እብ ተማም ዛበጠዩ። ወሐቀሁ ዋርድዮት እንዴ ወደ እግሉ አበናይ እንዴ አርፈዐ አተብረከዩ። ህቲ ሕወዝ ቲ። ኣዜ ዶል መጽኣኑ አቡዬ ቤሌኒ ጌሰ ከጸብሕ ሀቡ ቤሌኒ። ለሙዲረ መድረሰት ኡደት ካሰት ቡ። እበ ነብረ ክምስል መጽኣኩወ ህቲ ህዩ ድሙል እቺ ሰበት ዐለ ነብረ ኢትረኤቲ። ጠዋሊ ለኣበነት ከረ ወሀለም እንዴ አበሌኒ ተማም ዐጅኒ። ሕድ ዲብ እንዛብዋ ለሙዲር መጽኣ። ወምን ሕድ እንዴ ፈራቀቀነ ለሙዲር ዲብዬ እንዴ ትወለበ እንተ እምበል እጃዘቺ እግልሚ መጽኣኩህ እንዴ ቤለ ለኣበነት እዩ አርፈዐዩ። ነብረ እግል



ከንቲባይ ዐሊ ከንቲባይ ዐሰማን

ዋድያመ ሕነ። እግልሚ ክልመት ዐረቢ እንዴ ኣመርነ ልኡክነ ሰበት አግዴነ። ህቲ ህዩ ሸክ ሰበት ወደ ዲብክ “መን ወሬኩም አልከላም ደ?” ቤሌነ። ኣዜመ ተዐወትን ዲብ እንብል ነሰኢነ ከኣብረኪነ። ኣዜ እመን ራፍዳም ዲብ ሕነ ሓምድ ሐሪገ ፊክ እብ ሰበብክ ክእነ ገኣኑ ልብለኒ። ወእብለ አልዐሰር ትላኬነ ወእግል ኢነሐሴ ነሳዩሕ እንዴ ሀቤነ ፈደሰነ። እብሊ ዲበ ወክድ ለሀይ ዲብ ነቅፈ ለዐለት መድረሰት እግል ትልህዩ ናይ ሻሬዕ ፈርግ ተህዩብ ይዐለት። ኣዜ ዲብ ክእነ ዲብ ሕነ አምዕል ሐቲ መደርሰ ናይ አምሐረ መጽኣ፡ ኣዜ ለውላድ ዮም እሊ መደርሰ እሊ ሐቆ መጽኣኑ ሕነ በሰ ዮም ኢንቅረእ ቤለው። ኣዜ እትሊ ወክድ እሊ ለመድረሰት ለከሰትሮ ለደረሳ ቶም። አሰቡሕ እንዴ መጽኣ ከሰትሮ። እሊ አምዕል እሊ ለመፍቲሕ ምስልዬ ዐለ። ወለከንሱ ኖሼ እግል ሀቦምቲ መስኡልየት ራፊዕ ለዐልኩ። ወዮም በሰ መድረሰትን ሐቆ ድራሰት አምሐረ መጽኣተ እድራብ ምን መድረሰት ኒዴ ቤለውነ። በሰ ምን

ዮም እሊ ዐረቢነ ሐቆ ይእንቀርእ ገብኣነ አምሐረ እግል ንድረሰ ኢነሕዜ እንቤ ወምን መድረሰት እግል ኒቂብ አተፈግነ። ወእብላነ ጠዋሊ አሰክ ሼክ ጊሰነ ወመፍቲሕ ዲብ ጁብዬ ህለ። እሊ ምዕል እሊ ዲብ ሼክ መጽኣነ ወዲበ ወዐልነ። ወመፍቲሕ ምስልዬ ሰበት ዐለ መድረሰት እሊ ምዕል እሊ እብ ሰብብ እቢ አምሐረ ግፍልት ወዐለት።

ለቴለል ክእነ ክምስል ገብኦ ፖሊስ በለቀው። አድህር ክምስል ገብኦ ለመደርሰን እግል ክል ደረሳይ ከ ዋሊ አምሩ አሰኣለው ወወልክ አዩ ህለ ቤለው። ወፈጅራተ ዋልዴነ ዲብ ቲቲነ ዲበ መድረሰት መጽኣው እብነ። ትሰኣለውን ወሚ ገኣኩም ቤለውነ። አምሐረ ይእንደርሰ በሰ እንቤ ወአማን አሰኣልናሆም። ላኪን ለሹም ወመስኡለ ዐድ ለሕኩመት ሰመዖ። ለወክድ ለሓለትን ክምስል ረኦ “ከላሰ ለመደርሰ ለማሌ መጽኣኩም እበ ዕንኩም ኢትርእው። ” ወእሳሆም ዲብ ሕሴን ለልትበህል መስኡል ተዕሊም ዲቡ ተለፎን እንዴ ወደው ለእናሰክ ለእሉ ነድኣክ እትን እተ አተብሰ መጽኣክ ሰበት ህለ ትከብቲ” ቤለው። ወሕነ ዕቃብክ አሰክ እደይነ ለሐብዋ ትጃዜነ። ወካልእ ቀልጠት ዶል ተሐሰል መስኡልየት እሊ ልጅነት ናሰኣተ ህሌት እሊ ትሰኣሎ ወሕናመ እሊ ንሰኣል ቤለውነ። ወሐቆ እሊ እንዴ አልተዘምነ ዲብ እንቀርእ ኣነ ዲብ ሰነት 1958 ለመድረሰት ራቤዕ ፈሰል ክምስል በጽሐኑ አትካረምኩወ ወሱዳን ግሰኩ። ወከረ መሐመድ ላተ ዋሰለው አሰክ አሰመረ በጽሐው እበ ወማሽእሊ ደረጀት በጽሐው” ልብል መሐመድ ዐብደላ።

ምን ሕላይ ቀዳምያም

ምን ዲብ ሰነት 1913 ለትከተብ ክታብ ሐይለት ትግራይት እያሱ ወድ ሀብቲስ እግለ እግለ አብኣስተን ሐወን ወኣበወን እት ሸፍ ለትቀተለው አንሰ እግል ለአደፋፍእ ለሐለያ ሕላየት ክእና ትብል፡-

አምበልኪማ ወፋዋና - አንሰ ክሉቲ መንበለ

ክሉ ግሰት ይዓራ - ወክሉ ተነት ኢሰሐና

ምን እንዴ ወኪን - አርእሰ ሐዳቲ ትገደለ

ወለረኣሰ ጌሳቲ - ወለጽፍራ ደገና

አምና ሐቆ አቡኪ - ትሰሐቃ ሚቡ ወደኣለ

ምን ሞታ አብዕብኪ - ዮም ላሊ አክረራ

ዐሚካሊቲ አቡኪ - ወእንቲ ወለት ደፈራ

ዐሚካሊ እብ ገብኦ - አቡኪማ ኢደሐና

ዐድና ግልብዝ ሐርማዝታ - እበ ለሸየም ትቃተለ

ዐድ ለፋላት ኢለዐድም - ዋሳ ወለደንገራ

ትበኣሳ ሕመድ ወድ ጀሚልቲ - እት ቀበታ ትወገራ

በዐል ጆር ወድ በዐል ጆርቲ - ለእለ ቤለ አሸበራ

ትበኣሰ ኤሎሰ ወድ ድራርቲ - ዓያ ለኣልባብ ሳጠረ

እግል ለኣሮት ቀትላቲ - ወእግል ለኣሮት ሓከራ

ጽገም ሰኒ እሊቲ - እትለ ዛምተት ትካፈለ

ልቡ ለፈረሰ ይኣባ - እብ ትላባዳ ወትጸሐለ

ወልቡ ለመንዱቅ ይኣባ - ባሮት ለሕፋን ሰረራ


ወልቡ ለአዳም ይኣባ - ለደገል ደገል ጸቅለለ

ዋርፍ ሐረምዝቲ - ደራበዎ ከጠሐራ

ምን ሸንጌራ ምን ቀንጸ - ዲብ አፍዐበድ አትሰኣለ

እብ ሚ ለማይት ኢቀብራ - ወእብ ሚ ለታርፍ ይኣደኣለ

ወድ አብ ሳዋር መንባሁ - ደብር ደንደን ትሸፈለ።



ቢንያም ለሐሰ መትባድራይ ዐጃላት ሄፍታቸው ገላ


ፈረንሳይ ህጋዊ ልሐሰ ወጣታዊ ፈረንሳይ

ኤርትራ መትባድራይ ዐጃላት ቢንያም ግርማይ፡ እት የም 29 ኖቨምበር፡ ዲብ ዓሰመት ርዋንደ ኪጋሊ እት ገላት መናሰበት፡ እት ናይ ዐባዩ 'ለሐሰ መትባድራይ ዐጃላት አፍሪቃ ሰነት 2025' ገብኦ።

እት ጃንዘት፡ ቀደም እለ ሰስ ኤርትራዊን ለብኡም 21 መትባድራት ዐጃላት ርሽብም ዐለው። ቢንያም ግርማይ፡ ሄፍታ ምሉእብርሃን ወሚልክያስ መእከሉ፡ ለናይ ደንገበ ርሽብም እንዴ ትበህለው ሰበት ተሐረው፡ ለጃንዘት አስክ ኤርትራዊ ትደለል ክም ህሌት እኩድ ዐለ። አሎም፡ ኤርትራዊ ቢንያም ግርማይ ህይ ተዐውት እበ።

ቢንያም፡ እት ሰነት 2024 እት ዙር ፈረንሳ ሰለሰ ዐውቲ መርሐለት፡ ወእብ ዐቢሁ ህይ እት ሾላት ዕውት ፍሉጎት አክደር ሰበት ገብኦ። እት ሰነት 2025'መ ምን ሰእየት ለዐለት እቶም መትባድራት ተ።

ምናተ የም ዓመት ላቲ፡ ሐ'በት ናይ መርሐለት ዐውቲ እንዴ ኢለኦም፡ ተ ናይ ዱረ ፈረንሳ ጅግራሁ ለአትመመ። እለ ክእነ ዲብ እንቲ፡ ብዙሕ ወክድ ናይ 2ይት ደረጃት ዐውቲታት ረክብ ለዐለ መትባድራይ፡ እለ ጃንዘት



ምን እግል ልትሐረም ኢቀድረ። እብ ልእክት ሺድዮ ፈርሐቲ ለሽርሐ ቢንያም፡ እግል ጃንዘት ሓምሳይት ዶሉ ተ ልትዐውት ዲበ ለሀለ። እት ሰነት 2020፡ 2021፡ 2022 ወዲብ 2024'መ ለጃንዘት እሉ ሳረት ኢኮን።

እት ሰነት 2023 ላኪን ለጃንዘት፡ መትባድራይ ዐጃላት ኤርትራ ሄፍታ ምሉእብርሃን ዕውት እበ ዐለ። ሄፍታ እትለ ናይ የም ዓመት ጃንዘትም ካልኣይ ለሐሰ አፍሪቄ መትባድራይ ዐጃላት ትበህለ። አሰር እሎም ዐባዩ ሐወ እንዴ ተለ እት መጽእ ሰፍታት ዐውቲታት እግል ለአምጽእ ለልትሰኢ ምኑ ሚልክያስ ማእከሉ ህይ ሳልሳይ ደረጃት ጸብጠ።

ለሐልፊት ጅምዐት ምስል ፈሪቁ

ኢንተርማርሽ ግዋሉ (ውዕሉ) ለአትመመ ቢንያም፡ እትለ ሰነት የም ዓመት፡ 21 መርሐለት ዱረ ፈረንሳ ለብኡት፡ እት 60 አምዕል ጅግረ 10,466 ኪሎምትር ሄረረ። 1646 ንቅጠት የሲኣይ፡ እግል ርሐ፡ ወጠኑ ወፈሪቁ ኢንተርማርሽ አክእለለ። እለ ምን ኩሎም አፍሪቃም መትባድራት ዐጃላት እት ሰልፋይት ደረጃት ለረትቡ ንቃጥ ህይ፡ እበ ጃንዘት ክም ልትዐውት ምን ወደዩ ጋራት ተ።

እምበል እለመ፡ እት እግል ሰልፍ ኢነት ለትሆየት ናይ ድወል ጃንዘት፡ ፈሪቅ ዐጃላት ኤርትራዊ እግል ማውሪሽስ ወርዋንደ እንዴ በድረ፡ ናይ እለ ሰነት ለሐሰ ፈሪቅ ነሰኣት። እት ዐጃላት ድወል አፍሪቃ ትዋሌ ለህሌት ኤርትራዊ፡ እት ሐልፊት ሳምንመ፡ ሻምፕዮን ድወል አፍሪቃ ሰነት 2025 ክም ገላት ልትዘክር።

እለ እብ ፈደራሽን ብድረ-ዐጃላት አፍሪቃ ምን የም ዓመት እንብትት ለህሌት ጃንዘት፡ እግል እት ለትፈናተ ዓማር ለህለው ፈዳብያም መጃል ዐጃላት አፍሪቃ ወእግል መደርቢን፡ ለትሆየበት።

እት ናይ ዐባዩ አዋልድ ህይ፡ ወለት ማውሪሽስ ኪምበር ሌ-ኮርት ለሐሰት መትባድራይት ዐጃላት ነሰኣት። እለ ወለት 29



ሰነት መትባድራይት፡ “እት ዱር ፈረንሳ እት መርሐለት ለትዐውት ወፍሌጎት ህርዲ ለለብሰት ሰልፋይት አፍሪቃዊት ጋብኣት ህሌት።

እለ ናይ የም ዓመት ጃንዘት ሐሶ እት ዐጃላት አፍሪቃ፡ እብ መትካም ሐዲስ ለትበገሰት እት ገብኦ፡ ምን ሰነት 2012 እንዴ አንበተት እግል ውላድ ትትሆየብ ዐለት። ለሰልፋይ ንሱር እለ ጃንዘት

ህይ፡ ኤርትራ ናትናኤል ብርሃኔ ተ። ሰነት 2014 መክሰብ ደበሳይ፡ 2015 ዳንኤል ተክሌሀይማኖት፡ እት ሰነት 2016 ህይ፡ ተሰፎም ዐቅባማርያም ዕውታም እባ ቶም።


እብ ዓመት ህይ ኤርትራዊ፡ 10 ኢነት እብ መትባድራት ዕውትት እለ ጃንዘት ጋብኣት ተ። ውላድ ግብለት አፍሪቃ ሰለሰ ዶል፡ ወርዋንደ ህይ ሐቲ ኢነት እለ ጃንዘት ናሰኣት ተን።

ጅግራታት ፕሪመርሊግ ገላት 13ይት ሳምንቲ

ለድቁብ ፍረቅ እንግሊዝ በህለት ፕሪመርሊግ እት ሐልፈ ሰነት ወኣትኒን ናይ 13ይት መርሐለት ጅግራታቱ ዋዲ ዐለ።

እትለ ገሌሁ ፍረቅ ንቃጥ ዲብ ክሰር፡ ገሌሁ ህይ ንቃጥ ለወቀለ ጋብኦ ህለ። ለሰባሳ ሳምን ደርብ አድሕ ንቃጥ ለክሰረ ፈሪቅ ሊቨርፑልም እትለ ሳምን እግል ዌስትሃም እንዴ ቀልበ ሰለሰ ንቅጠት ወክልኦት ጎል ካሰብ ህለ።

ለዲብ አዝመት ክም ህለ ልትሆደግ እቡ ሊቨርፑል፡ ግረ እለ ኢሐሶስ ምን ገብኦ፡ ሕሉል



እግል ልባሰር ቡ ድኢኮን፡ ሰሚቱ ዲብ ትደሀር ትመጽእ ህሌት። እብ አሳስ እለ፡ ፍገራት

እለ ሳምን ናይ ፕ ሪ መ ር ሊ ግ ፡ ብሬንትፎርድ እግል በርንላይ 3-1፡ ሳንደርላንድ እግል ቦርኔማውዝ 3-2፡ ማን ሼ ስ ተ ር ሲ ቲ እግል ሊድስ 3-2፡ ኒውካሰል እግል ኤቨርተን 4-1፡ ፋልሃም እግል ቶትንሃም 2-1፡ ማንሼስተር የናይትድ እግል ክሪስታልፓላስ 2-1፡ ሊቨርፑል እግል ዌስትሃም 2-0፡ አሰቶንሺለ እግል ምልሽስ 1-0፡ ብራይተን እግል ኖቲንግሃም ፎሬስት 2-0 እት ቀለቦም፡ ፔልሲ ወኣርሰናል ህይ 1-1 ትፈናተው።

ምን እት ሰቡረት ፕሪመርሊግ እት ሰልፋይ ተርቲብ ለህለው ሐምስ ፈሪቅ ምን እንርኢ ህይ፡

- 1. አርሰናል = 30 ንቅጠት
- 2. ማን-ሲቲ = 25 ንቅጠት
- 3. ፔልሲ = 24 ንቅጠት
- 4. አሰቶንሺለ = 24 ንቅጠት
- 5. ብራይተን = 22 ንቅጠት



ሜዳን ኦልድትራፎርድ ካስ ዐለም ኢንባት-ኒግል ልትሐደር ልትከደም

ዱለት እንግሊዝ፡ ካስ ዐለም አዋልድ ሰነት 2035 እግል ትትሐደር፡ ማንሼስተር የናይትድ እግል ልብክዩ ሳትት ለህለ ስታድየም ኦልድትራፎርድ ሐዲሱ ዎርት ምን ለትሐረው 22 መያዲን ጋብኦ ህለ። ሰበት እለ፡ ለገዲም ሜዳን ኦልድትራፎርድ፡ እት ሰነት 2028 ለገብኦ ሻምፕዮን አርብ እግል ልትሐደር ክም ኢኮን ልትሆደግ። እለ ህይ እብ ሰብብለ እግል አርሐቡቲ ለገብኦ ሽቅል ተ።

በራምጅ አትሳናይለ ሜዳን ኢተመ ምን ገብኦ፡ ስታድየም ኦልድትራፎርድ እብለ ናይ አዜ ሽክሉ እግል ለአተላላ ተ።



እብግሊዝ፡ ስትላንድ፡ ዌልስ ወቅብለት አየርላንድ፡ እግል መትሐዳርሊ ካስ ዐለም አዋልድ ሰነት 2035 ክም ልትጃገረ ለአትሐመረ ፊፊ፡ እት ሰነት 2026 ሕድርናትለ ጅግረ እት እሰወ ምንን ክም ገብኦ ረስሚ እግል ለአሰኢል ተ።

እብ ዓመት እት ፈግረት ሐብሬ 22 ሜዳን ሕሩያም ህለው። 16 ምናም እት እንግሊዝ፡ ሰለሰ ዲብ ዌልስ፡ ክልኦት ዲብ ስትላንድ ወኣር ህይ እት ቅብለት አየርላንድ።

ምን ሰነት 2031 ጅግራታት ካስ ዐለም አዋልድ፡ እት ፍንጌ 48 ዱለት ለገብኦ ጅግራታት ለልከቅፍ እግል ልግበኦ፡ ወምስል ተሸኪል ፍረቅ ውላድ እበ ትትወጤ ገበይ ለገይስ እንዴ ገላ 15 ስታድየም ልትዳሌ እለ። ለጅግራታት ካስ ዐለም ፍንጌ ፍረቅ አዋልድ እት ቀበት 39 ምዕል ለተምም እግል ልግበኦ ህይ ስቲት ህለ።

